




22.6213
1030.673
012

名臣
武功
政事
文學

正定縣志

三十六至三十九



Kodak Color Control Patches

Blue
Cyan
Green
Yellow
Red
Magenta
White

正定縣志卷三十六

名臣

古大臣明良遇合喜起廢歌國計民生盡心籌畫武

功文治竭力周旋故能勲在當時名垂後世正定山

川雄勝鍾靈毓秀代有傳人

國朝教化涵濡猷為赫濯內而廟堂黼黻外而疆域旬

宣莫不竭節盡忠爭光先烈詳加鋪叙以鳴

國家之盛非僅閭里之榮也

五代

張允

初為張文禮參軍唐莊宗討張文禮允脫身降
除魏州功曹累遷左散騎常侍晉高祖即位屢

救天下允為駁論以獻言救者小利而大害久而不勝其禍無救者小害而大利久而不勝其福夫天之為道福善而禍淫若捨惡人而變災為祥則是天又喜人為惡也凡天之降災所以警戒人主節嗜欲務勤儉恤鰥寡正刑罰而已是時高祖方好臣下有言覽奏大悅後允事漢為吏部侍郎隱帝誅戮大臣京師皆怨允嘗退朝不敢還家止於相國寺周太祖以兵入京師允匿於佛殿承塵墜而卒

宋

李

至

字言幾舉進士釋褐將作監通判鄂州旋擢著作郎直史館會征太原命督澤潞芻糧累遷右補缺知制誥太平興國八年轉拜翰林學士加右諫議大夫雍熙初議親征范陽至上疏以為用兵之道必務萬全幽州為敵右臂王師所向彼必拒張攻城數萬兵食倍之况范陽之旁坦無陵阜去山既遠取石尤難願畜威養銳觀釁以待更縱彌年亦未為晚後以日疾數表求解機攻授禮部侍郎進秩吏部兼秘書監選三館書置閣中俾至總之上嘗臨秘閣出草書千字文為賜至勒石上曰千字文乃梁武得鍾

繇書命唐興嗣次韻而成理無足取若有資教化莫如孝經乃書以上純化五年兼判國子監至上言五經書疏已板行二傳三禮孝經論語爾雅七經疏未備乞令直謹崔熙正孫奭崔偓佺等重加警校以備刊刻從之至道初真宗正儲位以至與李沆並兼賓客詔太子事以師傳禮真宗每見必先拜至等上表不敢當禮詔慰之真宗即位拜工部尚書參知政事一日上訪以靈武事至上疏言河湟之地夷夏雜居是以先王置之度外望陛下以元元為念不以巨憝介意後靈武卒不能復尋以疾求解政柄授武信軍節度卒贈侍中至剛嚴簡重人士罕登其門

王化基

字永圖舉進士除大理寺評事遷贊善大夫知嵐州趙普為相以驟用抑之請改幕官化基嘆

曰丈夫生明時豈能事幕府者耶抗表自稱正定男子太宗覽奏曰化基自結人主慷慨之士也召試知制誥以右諫議大夫權御史中丞太宗一日御便殿問以邊事對曰治天下猶植木所患根本不固固則枝幹不足憂朝廷治則邊鄙何患乎不安嘗慕范滂為人獻澄清略言復尚書省慎公舉懲貪吏省冗官

擇遠官凡五事其擇遠官內論西川廣南長吏不任
負罪之人則遠方受賜尤為切中時弊帝嘉納之俄
知京朝官考課遷工部侍郎至道三年超拜參知政
事後以工部尚書知河南府卒贈右僕射諡惠獻子
舉善以薦舉歷奉議大夫

王舉正

字伯仲化基長子以廕補秘書省校書郎進士
及第累遷翰林學士右諫議大夫參知政事前

日吏有馳報者舉正方燕居齋舍徐謂吏曰安得
漏禁中語既入謝仁宗曰卿恬於進取未嘗干朝廷
以私故不次用卿時陝西用兵呂夷簡以宰相判樞
密院舉正曰判名重不可不避也乃改兼樞密使遷
給事中會御史臺訟舉正妻悍不能制如謀國何舉
正亦自求去遂以資政殿學士知許州光化軍叛卒
轉掠旁境而州兵有謀起為應者舉正潛捕首惡斬
之徒知應天府累遷左丞皇祐初拜御史中丞奏張
堯佐庸人緣妃家一日領四使使賢士大夫無所勸
不報舉正因留班廷諍乃奪宣徽景靈二使又曰先
朝用人雖守邊累年者官止遙郡刺史今所用未盡
得人而刻期待遷後有功者何所勸且轉運使察官

吏能否生民休戚賴焉命甫下而數更不終歲而再
易思澤所以未宣民疾所以未瘳者職此故也御史
唐介貶春州舉正力言之介得徙英州後除觀文殿
大學士禮部尚書知河南府入兼翰林侍讀學士每
進讀前代治亂之際必再三諷諭以太子少傅致仕
卒諡安簡有平山集中書制集內制集五十卷

元

許

辰

字君輔世業醫其先曲沃人父國楨以醫事世
祖母韓氏亦能醫侍莊憲太后稱旨賜宅正定

辰因居焉初辰隨父入侍帝見其辭理明辨進止莊
重喜之賜名忽魯火孫命從許衡學入備宿衛除禮
部尚書改尚醫太監轉正議大夫兼提點太醫院事
有竊大安閣禮神幣者將誅之羣臣莫敢言辰諫曰
事神善事也因置人死地臣恐神不享所祭帝即命
釋之辰與承相安童善國政多所贊益桑哥忌之數
譖於帝帝不信桑哥敗繫於左掖門帝命辰往唾其
面辭不可帝稱其仁厚賜白玉帶且諭之曰以汝明
潔無瑕類此故賜之成宗即位以中書右丞署太常
事俄改陝西行中書省右丞時關中饑同列以未得

請不發粟辰日民為邦本俟命下無及矣擅發之罪
 吾當獨任之不以累公等也遂大發粟而命亦下明
 年旱禱於終南山而雨歲大熟民畫像祀之辰不事
 生產田宅皆上所賜有足疾敕稱小輿入禁中訪以
 舊事後足益弱國有大政詔就其家問之特授光祿
 大夫司徒食其祿終身卒贈趙國公諡僖簡
 按許辰入籍恆山載在元史前此未曾錄入補之府
 志

王

約字彥博博覽經史通達國體至元十三年翰林
 學士王磐薦為從事承旨拜監察御史首請建
 儲及修史事賑河間饑均覈有方全活甚眾尋遷中
 書右司員外郎成宗即位言二十二事實京師放差
 稅開獵禁蠲逋負賑窮獨停冗役禁鷹坊振風憲除
 宿蠹慰遠方卻貢獻詢利病利農民勵學校立義倉
 覈稅戶重名爵明賞罰擇守令汰官屬定律令革兩
 司人請中書去繁文一取信於行省一責成於六部
 皆從而行之拜翰林直學士知制誥同修國史歷刑
 部尚書平章賽典赤安西王阿難答與左丞相阿忽
 台潛謀為變命刑曹按責其狀約曰在法謀逆不必
 榜掠竟當伏誅由是結知仁宗遷禮部尚書請定丁

憂之制申旌表之恩免都城煤炭之徵皆從之明年
 進太子副詹事同列復傳命增立右衛率府取河南
 蒙古軍萬人統之約屏人語曰左衛率府舊制有之
 今置右府何為諸公宜深思之不可累儲君也又命
 取安西兵器給宿衛士并往福建取繡工童女六人
 約俱諫止之仁宗皇慶元年拜集賢大學士疏薦國
 子博士姚登孫應奉翰林文字揭傒斯成都儒士楊
 靜皆除擢有差丞相帖木迭兒專政奏遣大臣分道
 奉使宣慰命約巡行燕南山道使還拜樞密副使俸
 祿所入布散姻族外及貧士平生著作有史論三十
 卷高麗志四卷潛印藁三十卷行於世

高

鳴

字雄飛少以文學知名世祖即位名為翰林學
 士兼太常少卿至元五年立御史臺以鳴為侍
 御史風紀條章多其裁定尋立四道按察司選任名
 士鳴所薦居多天下初定中書樞密事多壅滯言者
 請置督事官各二人鳴曰官得人自無滯政臣職在
 奉憲願舉察之母為員外置人七年議立三省鳴上
 封事言方今天下事繁取決一省猶曰有壅况三省
 乎且多置官者求免失政也但使賢俊萃於一堂連

署參決自無失政豈必別官異坐而後無失政乎故曰政貴得人不必多官不如一省便世祖深然之川陝盜起省臣患之請專戮其尤者以止盜朝議將從之鳴諫曰制令天下上死囚必待論報所以重用刑惜民生也今從其請是開天下擅殺之路害仁政甚大世祖稱善令速止之鳴每以敢言為帝所重嘗入丙值大風雪帝請御史大夫曰高學士年老後有大政就問可也其見敬禮如此遷吏部尚書卒有文集五十卷

李元禮

字庭訓性端重燕居不妄言笑歷易州大都教授遷太常博士撰世祖及順聖皇后尊諡議及

請諡園邱升附太室禮文多所詳定成宗元貞初拜監察御史五臺山佛寺成太后將臨幸元禮上疏曰伏見五臺山初建寺宇土木既興丁匠夫役不下數萬人附近數路州縣供役煩重男不暇耕女不暇織百物踊貴民不聊生又聞太后親臨五臺布施金帛廣資福利其不可者有五何則時當盛夏禾稼方茂扈從經過千乘萬騎不無蹂躪一也太后春秋高往復暑途數千里山川險惡不避風日萬一調養失宜

悔將何及二也陛下即位以來遵守祖宗成憲正當兢業持盈之日凡一舉動必書簡冊以遺萬世書而不法將焉用之三也夫財非天降皆出於民今朝廷支持調度百倍往時何堪勞民傷財以奉土木四也佛以慈悲方便為教不與物競雖窮天下珍玩供養不為喜雖無一物為獻亦不怒今太后欲為兆民祈福福未獲而先受勞致天子曠定省之禮軫思親之懷其不可者五也伏願迴轅中路端處深宮儉以養德靜以頤神上以循先聖后之懿範次以盡聖天子之孝思下以慰臣民之顛望則不待祈而福自至矣帝怒遣近臣賫其章勅丞相完澤平章不忽木鞫問完澤曰往吾亦以此諫太后曰吾非喜建此寺蓋先帝嘗許之非汝所知也不忽本抗言曰他御史懼不肯言惟一御史敢言誠可賞也遂入奏帝沉思良久曰御史之言是乃復元禮職未幾改國子司業卒贈隴西侯

蘇天爵

字伯修釋褐授從仕郎大都路薊州判官改翰林國史院典籍至順元年預修武宗實錄陞修

撰擢江南行臺御史訊囚於湖北湖北地僻遠民獠雜居天爵冒瘴毒徧歷其地囚有訟寃者天爵曰憲

司歲兩至不言何也皆曰前此訊囚者應故事耳今聞御史至當受刑故不得不言天爵為之歡息每事必究心雖盛暑猶夜篝燈治文書無倦明於聽斷多所平反為監察御史在官四閱月章疏凡四十五上自人君至於朝廷政令稽古禮文又問閭幽隱其關乎大體繫乎得失者知無不言尋除中書右司都事兼經筵參贊官累遷吏部尚書參議中書省事時朝廷更立宰相庶務多所張弛天爵言無顧忌夙夜謀畫鬚髮盡白後為浙江行省參知政事總兵於饒信所克復者一路六縣其方畧之密節制之嚴雖老帥宿將不能過之然以憂深病積遂卒於軍中

明

張

春

正統進士授南京廣東道監察御史進士釋褐為御史自春始時中官王振用事南京刑部尚書齊韶黨惡縱恣徽商犯法當死韶受賂不為理春按得實據實劾奏與韶並逮至京韶與商俱伏法詔復春官由是春直聲動天下歷官山西僉事應天府

王

宸

登宏治庚戌進士授吏科給事中歷本科都給事中時遼東守臣殺降事發奉命往勘有以干金來誘者宸不為動竟置以法及返查盤甯夏邊儲有友在治屬遣子通賄宸忿然斥出遂息交宏治末番僧那卜堅以左道獲幸宸率僚友上疏請繩以法疏上遂留中不出自是亦不敢復入矣正德初逆瑾擅權宸以剛直忤瑾繫獄六月幾死獄中終不屈尋隣其直釋之歷進光祿卿舊時樣米樣酒之類多入私家宸並宿弊盡革之其尹應天念根本重地百姓困苦輕役薄賦務在寬恤屬邑巨族孔姓者欲冒先聖裔賂以賄宸叱之竟不容居家孝友尤礪名檢人無間言

梁夢龍

字乾吉嘉靖癸丑進士

改庶吉士授兵科給事中

中慷慨言無所避劾先後兩家宰李默吳鵬行私當權狀時論壯之歷吏科都給事中大計天下吏勦積汰批人以為公不怒時世宗頗崇壇祀學士袁煒草青詞稱旨上傾心大用之夢龍知上意抗疏言相臣宜舉學術純正無輕掄選俾聖治不光昌上覽奏怒甚賴大學士徐階力救止奪俸半年擢順天府丞出副臬河南領河務會河決沛縣行河重臣議

開新河夢龍考箕誨鋪與卒同力晝不敢廬夜枕幘
席衣而處河上大暑疫作出俸買藥飲諸疫徒活數
萬人歷參藩關內山西按察使河南布政使都察院
右僉都御史鎮撫山東遼人避役登萊島艘中者數
千出沒抄劫無虛日夢龍相機宜條上招安三策八
事河塞宿遷口朝議通海運屬夢龍查勘試驗著有
成績會中州多盜大學士高拱為桑梓計遴有幹畧
者特遷右副都御史改鎮河南時有司以獲盜為上
功夢龍曰侯盜起獲之証吾民矣法當使無盜乃書
九議行之不數月盜悉解散入為戶部右侍郎改兵
部值遼東王杲賊捷上上特賜麒麟服命持節往賈
官運已陞右都御史總制薊遼首問四鎮軍所疾苦
為剔除之簡軍實修馬政築城壘謹烽堠慎擇將領
厚簡謀分偵探法常密授李成梁戚繼光方畧由是
先後奏大捷九上褒詔先後十餘下世廕一子錦衣
千戶邊墻告成晉太子少保召入視部事除種馬令
民如脫重負後以薊遼首功晉太子太保改吏部尚
書致仕歸優游林下二十年卒贈少保諡貞敏賜祭
葬祀鄉賢

賈應春

字東陽嘉靖癸未進士由南陽令歷陞刑部郎
中知山西潞安府改開封府車駕幸承天應春

在汴綜理諸務區畫精詳上過而賢之擢陝西按察
司副使巡按摺撫流議以聞被逮事明補山東鹽運
司同知累遷漢陽知府陝西按察司副使右叅政無
何甯羌賊起地方騷擾軍檄令視師以功陞左布
政就拜都察院右副都御史巡撫其地尋進兵部右
侍郎總督三邊軍務時西夷桀驁應春夙夜惕厲罄
心殫謀防禦備至擢至本部左侍郎加右都御史仍
兼院職總軍務如故在陝數年屢建邊功修築邊墻
萬餘丈未幾授南北戶部尚書考覈章程勾稽贏縮
國計賴焉晉階資政大夫以疾乞歸卒贈太子少保
祀鄉賢

許守謙

字受益藁城人徙居郡城嘉靖乙丑進士初授
開封推官訟牒填委聽斷明敏片言立決委查

錢穀勾稽詳慎評騭臧否明察無私隆慶二年擢戶
部主事陞郎中權關許墅督餉永平俱有能名晉浙
江副使調山西岢嵐道居二載丁父憂服闋補大同
左衛更調陽和偏頭老營俱臨絕塞陽和則制府在

馬事務繁鉅岢嵐獨當一面籌贊機務規畫兵食修築工程始終拮据擢荆南叅政總督鄭公上疏留之未幾加按察使調還岢嵐尋拜右僉都御使巡撫山西巡閱邊關校閱士馬汰除貪墨一時將吏肅然時順義嗣封同心籌畫塞事再定邊疆賴之晉副都御史移撫宣府內遷刑部右侍郎尋改兵部轉左致仕歸閉門却掃與二三耆舊結詩酒盟郡邑之庭非公不至居鄉好義樂施拯災恤患捐數百金為邑人建社倉上書當道增驛站銀以甦疲困族黨不能自振者出資悉周之萬厯末邊圉多事薊遼總督邢公以守謙負安攘大畧力薦於朝會卒不果贈尙書子祭葬祀鄉賢

張王敬 萬厯進士知長治縣以廉幹稱擢工部主事陞車駕司郎中時上久未立儲議並封三王待嫡

當國遂奉行之主敬上疏言無嫡立長古所通行未聞有待嫡者疏入不報未幾以憂歸終職方郎

王藻 字國華副使撫民次子天性孝友十二歲失怙勵志誦習十五歲補邑庠累試居高等涵泳德性以王忠信為本以希聖賢為業隆慶丁卯領鄉薦戊辰聯捷成進士授甯國推官署宣城縣有惠政經

畫一條鞭法民尤賴之王申陞禮部主事甲戌改廣東道御史差視中城巡鹽兩浙砥礪冰操執法持憲不少翫敵鹽政肅清丁丑按山東貞度肅僚綜覈精

密秉性清介辭受必揆以義一毫不敢苟首輔母過境羣皆送迎獨不往巡視京營劾首輔所厚者愈大忤相意外轉河南副使砥礪風節發奸摘伏振飭軍

旅緝捕礦匪時妖人之黨正熾設法解散全活甚眾王午轉濟南叅政監積猾盜香稅之弊設法貯之為立文簿而奸蠹莫施歲贏千金盡充公用署藩印有積羨數千金時宗室祿糧有缺即舉以授之甲申丁

丙艱歸服闋除隴右道叅政飭武備恤民瘼殫精振刷凡府縣紙贖心紅之數千金咸置不問轉莊浪道僻在邊陲地方雲擾且歲大祲糧餉匱乏增鹽引招

商運人爭應募不兩月而粟支一歲荷戈者無枵腹之憂以病乞休給事中李汝華巡按御史安文壁交

章薦之起用霸州兵備道地當南北之衝土地瘠薄民疲於賦役殫精撫治皆得安全地多貂璫有請託

率正色拒之王辰陞河南布政使轉山東藩庫收支吏胥為姦重入輕出州縣被害出納之際令解官自

兌宿蠹盡絕屬有水旱極力拯卹竭誠盡忠賢聲大

著積勞成疾乞歸不兩月卒深明周易博洽性理太極圖西銘等書罔不窮究其微妙居室儉樸不務華靡內無姬媵外無聲色七任藩臬未嘗繫一真金帶著有閒吟詩草祀鄉賢

王

蔚字國光副使無民長子童時玉表葵心操觚翔授山東滋陽令邑為東南孔道困疲不可支而宗室繁行無賴兇頑最難治蔚篤念民瘼於徵輸徭役里甲驛傳悉心調停更能清詞訟抑兼併郊塵蒼赤措之衽席然後與文教廣儲蓄水旱盜賊不能為災害至於宗人無賴者一切裁之以法皆凜然相戒莫敢犯滋陽大治持憲者推轂恐後乙亥授南京工科給事中淬礪名節知無不言毀譽利害不遑自顧豪勲墨僚據典章究之不少假借聲望赫然海內想望丰彩督理後湖黃冊積弊一清署刑科發奸伸枉都人加額頌之閱五載拜尚寶司卿旋改光祿寺少卿以憂歸又數年卒

國朝

梁清標

字玉立吏部尚書夢龍曾孫南雄知府維基子生而穎異識者知為公輔之器讀書目數行俱

下榻管成文鸞發泉湧十四補諸生崇正壬午領鄉薦癸未成進士授翰林院庶吉士順治元年

呈朝定鼎補原官旋丁艱旋里服闋還京六年授宏文院編修九年陞國史院侍講學士十年陞詹事秘書院學士禮部右侍郎畿輔告饑

世祖章皇帝分遣重臣往賑巡歷保陽諸州縣殫心察覈規畫周詳人沾實惠十一年調吏部侍郎特旨拜

兵部尚書宿吏黠猾咸惴惴斂手時蒙古諸部長朝關下

上目之謂蒙古曰此朕新用兵部尚書也知遇之隆類如此江南提督馬逢知素傑傲所在多不法

上諭令陸見逢知念舊例當赴兵部行跪拜禮乃托所知澆公求免清標面叱不少假借率令跪拜以折其氣

上聞之謂侍臣曰梁尚書不愧大臣矩度人咸謂能持大體云時有武林斥生誣逆首案叩闕意在婪詐株連

甚眾清標確訊盡得其情據實奏聞立置之法保全者數十家十六年夏海寇鄭成功猖獗直犯鎮江

世祖下詔親征遴擇隨征大臣十一人以清標多方略俾

提調各處兵馬旋有總兵梁化鳳捷至遂不果行康熙三年輔臣以選人壅滯議停科目清標力持不可曰科目一停不即復條例雖嚴他時可改且選法壅當另議疏通若停科則失海內心矣獨為一議卒不得罷五年調禮部尚書六年充會試主考特用策論試士清標崇實學黜浮議得一百五十人多知名士三月京察解任翩然歸里手葺蕉林書屋賦詩飲酒優游泉石有終焉之志八年

聖祖仁皇帝親政諭知其賢

特旨以尚書起用九年補刑部尚書

聖天子好生如天矜疑詳審獄無大小並出

睿裁清標仰體

聖意務期平允天下無冤獄十一年調戶部悉心會計宿

弊一清十二年秋分遣大臣奉

璽書撤南國諸藩清標之廣州移尚可喜家口十二月

達廣州可喜迎

旨於江濱次年偕督撫會議起行日期尚之信稱疾不至

又數日乃議之信攜家屬於二月度嶺四月中可喜

繼之而兵眾汹涌盡出什物鬻於市民多驚悸思竄

匿清標鎮靜以安羣心逆吳逆以反聞清標多方慰

諭兵民始安蓋安危所繫變在頃刻間而朝命適至止可喜之行諭清標還朝是役行萬餘里履危而安路由南雄拜先人祠堂於東郊外四十年前白頭老吏猶有存者咸厚遇之十三年四月自粵東回復命上在便殿召入詳奏往還始末併粵東事宜且盡却可喜

餽送儀物

天顏為一笑焉十七年奉

上諭舉博學鴻詞薦徐鉉等四人皆名士也十九年因星

變陳言奏免秦中運糧入川二十一年首夏旱

上傳問諸臣弭災之方清標言莫如省刑今承問衙門或

有遲延不結者請飭刑部督捕有案速結

上納其言二十三年命以戶部尚書管兵部尚書事蓋前

此為本兵者十二年比再任則恭遇昇平燧烽偃息

矣二十七年陞保和殿大學士奉 飭監修三朝國

史政治典訓平定三逆方略大清會典一統志明史

總裁三十年卒於位賜祭葬祀鄉賢著有蕉林詩集

蕉林文集棠村詞棠村隨筆棠村樂府蕉林奏草

梁清寬

字敷五夢龍曾孫大學士清標之兄也經濟闕博品誼端方以氣節文章為諸弟倡崇正庚午

舉於鄉 本朝順治丙戌捷南宮以二甲第一名傳
 臚成進士改庶吉士授編修戊子至試江南文運初
 開較閱精嚴所拔多知名士遷侍讀及侍讀學士尋
 進吏部侍郎銓法澄清部務綜核夙夜匪懈弊絕風
 清致仕家居與弟清遠等詩酒流連竟日忘倦尤工
 書法得其家傳碑碣之文照輝遠近以疾卒

梁清遠

生而穎異總角時趙南星一見輒器重之十六
 補諸生為學使左光斗所賞拔崇正壬午舉於

鄉癸未公車罷歸益肆力於古學博極羣書經史及
 古今文籍靡不淹貫成誦所為古文詞尤稱爾雅郡
 邑求文者戶外屢常滿順治丙戌成進士授刑部主
 事時律例未定清遠斟酌畫一勒為成書自是無失
 重失輕之弊調吏部歷考功文選司陞郎中屏絕請
 託筦察典嚴選法澄清皆當流品一清冢宰咸倚賴
 之陞太常寺少卿大理寺卿多所平反偶議一事與
 刑部都察院不合輒獨為一議或云無例答曰吾輩
 豈碌碌因人者耶卒得 俞旨其持正無所避類如
 此陞兵部督捕右侍郎時高逃連坐法嚴四方逮繫
 者囹圄皆滿因與同官條奏緝逃數事皆報可而
 逃之禁始定調戶部右侍郎未幾調吏部左侍郎

薦舉之人守杭州以病罷左遷光祿寺少卿乞終養
 歸服除補原官陞通政司叅議以疾歸生平敦道義
 識大體能斷大事親知有疑難造請立為剖晰事未
 形預料無不奇中又諳曉朝章典故典人物姓氏以及
 冠婚喪祭諸儀遇事援據古今確然不易性好觀書
 所居處墳籍環列四十餘年未嘗一日釋卷以壽終
 著有雕邱雜錄祓園詩集祓園文集

吳嵩廕

幼有異稟及長才具通敏博聞強記於書無所
 不通為文高古典則遠絕時趨試輒冠其儔伍

崇正丙子舉於鄉丁丑成進士出黃公石齋之門時
 人榮之同門多海內名雋而黃公獨器重之授戶部
 主事區畫精密酌緩急而量出入司農倚之如左右
 手筦通州倉釐別宿弊殆盡運弁無旁耗而京儲以
 裕轉員外郎擢汾州道叅議尋陞口北道副使其治
 率寬平敦大訓勵耕戰為務甲申寇難跳身歸 興
 朝受命起補河東道旋以憂去服闋補饒南道山澤
 巨寇負隅鴟張實繁有徒嵩廕素嫻騎射所蓄材官
 健兒不滿百而能以少擊衆往往克捷俘其渠魁餘
 黨解散凡八年饒以大治癸巳謝事寓江甯無何復

補河東道駕輕就熟政通人和戊戌陞廣東驛傳道
 五嶺初闢郵驛重困委曲調劑一時稱便庚子陞湖
 北道叅政地近滇黔方有緬甸之役人夫芻秣牒檄
 旁午手畫口授咄嗟立辨將吏帖然噤不敢譁康熙
 癸卯陞湖廣按察使理冤疏滯積贖一空冬十月陞
 河南布政使會卧病不能起卒於楚賜祭葬如例
 王鍾隴 布政使藻之孫父兆甯早歿母趙氏高邑太宰
 南星女亦早逝繼母許氏兵部侍郎守謙女撫
 之成立總角時得父母所遺隻字輒私藏之及長豐
 碩俊偉強記多智識者器之同舅氏學聰穎過儔輩
 尋補諸生然不樂習章句略識大意而已書法右軍
 遂名能書然亦不竟學每慨然曰大丈夫立世貴于
 適用何事作訓詁儒耶好走馬擊劍著短後衣從俠
 少年角逐縱鷹犬為娛顧論當時事成敗得失如指
 掌有所區畫多中肯綮忠毅公知為非常人陰縱之
 不甚督課愛護愈篤從入京師游於姚宮詹希孟之
 門姚公數稱之縉紳間多有知公者及忠毅公官總
 憲晉太宰謝絕請謁獨公在邸商略可否多所贊裨
 會內閣兩房需人鍾隴以恩例選入為中書舍人實
 臺山葉相國拔之云無何端禍起羣小力排忠毅公

而詎以賊下巡撫及巡按窮治事連子並甥鍾隴怡
 然就訊曰覆巢有完卵乎王者皆僉壬藉是媚璫掠
 治慘毒錢閣學士升貽書蔡太守官治陰護之得不
 死謫戍永昌時子女尚幼穉拜母就道觀者泣下在
 途經歷絕險益強健無怖畏及之戌所數事射獵人
 皆驚異爭市牛酒從之游醉後言議風發歌呼嗚嗚
 不知其竄身絕域也塞上無貴賤咸睽就之而其中
 賢者往往傾肝胆相結納于是盡得其山川阨塞用
 兵備邊之要才識益進久之璫敗得還上書訟冤復
 原官未幾擢翰林院典籍加儀部員外先後垂三十
 年謹守成憲不踰尺寸明末當國者各立門戶相排
 擊鍾隴正色立其間無所阿比即號為刻深者亦不
 之忌卒能調劑異同護持善類甲申遭國變跳身間
 道歸

世祖章皇帝御極內院思用耆舊復原官晉太僕寺少卿
 時舊章缺略凡有大典禮倉卒諮詢輒援故事應聲
 對如創舉玉牒經筵及纂修諸務所具儀式斟酌至
 當肆應不窮內院諸公之如左右手以勞勩兩晉
 太僕太常寺卿資望深茂冠於班行戊戌會試奉
 命入闈收卷得疾卒賜祭葬贈通政

王原撫

字安之太常卿鍾麗長子生數歲父遭璫禍遠戍塞外奉祖母許家居晨起慰問如成人長補

諸生尋入國學從父官京師數從英雄豪雋游甲申

之變朝士多被收父鍾麗亦在繫中時三光晦蝕海

水羣飛鉗網四張邏卒獍立原撫出入虎吻一身擔

拄無所怖畏內外營救卒脫父於難同繫詞臣宋之

繩等亦陰賴調護以免國朝定鼎父仍舊官原撫

以世家子拔入為中書舍人肅王將兵入蜀簡院中

諳掌故稱在使者以從原撫首與焉王師一戰巨憇

授首王知其才命攝川北道事其地控接羗番當屠

戮之後居室寥寥原撫披荆棘招流亡規模粗立權

拜參議署左布政使事初任川北王倚之如左右手

原撫殫心經畫招來偽將拔用人才議城守定經費

開屯田察牛種議改折復鹽政招買米豆分別行間

功罪悉與王造膝籌度奏入輒報可王師南下留守

保寧賊帥張顯聚眾四掠數為書招之不從陳於錦

屏山下遣騎還報須公身至營乃降原撫即欲單騎

往僚佐咸阻止謂賊叵測不宜履虎穴即往亦當多

從健兒原撫曰罷老吏卒能當劇賊數萬乎且余既

受國恩當以死報脫或有變命也竟與副將嚴自

明並抵賊營盛陳兵露刃環左右原撫不為動賊見

輒拜且泣曰公至誠待人如此吾屬無患矣原撫從

容諭以大義陳說禍福賊遂解甲降恩信大著無何

巡撫王遵垣卒軍府凶凶原撫方病瘧力疾巡城中

封印還庫以待命於是內外宴然及晉方伯王師

已旋熾賊羣起文武吏成就糧保寧九郡五州擁旗

燾稱將軍者不可勝數值歲饑斗米十餘金道躓相

望原撫委曲調劑補衣糲食與吏卒同甘苦蜀疆新

定將弁驕不可馴原撫以文吏處諸大帥間無圖籍

文簿可考稽無屬員胥吏可分任左圓右方手畫口

授臨機肆應善然立解枕戈卧甲如是者二年而羣

盜悉平始與秦通東西攻討大小數百戰而不虞匱

乏者賴原撫為之輸輓也辛卯歲初舉賓興原撫提

調闈事王司己至而聞有賊警蜀士鳥驚獸駭爭自

逃匿深念人才可惜不宜虛大典貽簡書羞同巡按

郝浴力督士子入鎮院經營整暇以示鎮定甫撤棘

而賊渠劉文秀率眾數十萬疾走近郊矣原撫晝夜

戍樓為城守計賊眾登山臨嘉陵江俯看城中陽言

曰若好為我炊我且入城朝食鉦鼓之聲聞數十里

城中大恐原撫簡丁壯治戰具勇氣益奮人心少安

會平藩兵至率精銳擊賊人人殊死戰遂大破之賊
賊殆盡時保甯兵不滿千官役厮養悉驅充伍密白
中丞李公我兵少非用奇不可中丞用其謀卒奏成
功捷 聞得加一級陞陝西榆林道副使榆林爲隍
中地雖內外一家抵任後調繆繕治常若有事暇則
從將帥射獵察塞上要害處嚴斥候巡城障撫馭屬
夷皆得其情狀以是邊政修舉踰年擢參政守大梁
奉督撫檄治河日處河干冒犯霜露手足胼胝不期
年而工告成論功加一級遷按察使丁父憂服除補
閩臬時海上多故訟獄繁興案牘山積原撫剖決如
流數月塵坳一清在閩三年陞廣西布政使總理鹽
課稽核賦入具有法程粵人便之康熙丁未朝議裁
右藩遂旋里築室數楹蒔花種竹以自娛偶卧病小
愈忽一夕中痰卒年五十三歲其在蜀也中丞直指
交相引重蜀人戴之猶慈母至今頌聲不衰初入閩
制府李公見公虬髯私謂參佐曰臬長貌若此其武
健之吏乎復察其寬平乃笑語之曰吾向以皮相幾
失之子矣於是益親愛之其卒也 賜祭葬崇祀河
南福建廣西名宦

劉元慧

四齡失恃呱呱若成人見者莫不異之垂髫卽
厚重不苟言笑十齡受書一目成誦十四入學

十九應順天甲午鄉試逆旅中有少女來窺拒之甚
力而女復來公遂移他所僕人怪之答曰此房不利
終不言其故是科舉於鄉辛丑成進士授鄒平令鄒
邑地瘠民貧累歲逋賦約三萬金民逃亡田益荒蕪
元慧多方招集流民復業宿逋漸清復以除荒力懇
當局疏請蠲免民困少蘇甲寅乙卯滇閩大兵過境
供給悉派里舍元慧變產以供調發而民間帖然遠
近咸以爲神戊午撫軍以治行第一薦舉補吏部驗
封司主事陞稽勳司員外郎辛酉典河南試矢公矢
慎品臨精詳旋陞郎中調文選司洞悉情弊杜絕包
苴掌銓半載積弊一清由通政司參議轉鴻臚寺卿
左通政丁內艱服闋補原官陞僉都御史順天府尹
每事持大體不以察察爲明提綱振紀輦下肅然轉
宗人府府丞左副都御史告歸命諸子葺舊廬蒔花
種竹與一二故人享林下之樂己卯以疾卒祀鄉賢

張

蓮

康熙壬戌進士丙寅考授內閣中書癸酉典試
廣西丙子陞禮部主事清操素著辦事勤慎奉

旨調吏部稽勲考功司主事陞員外郎中居官勤慎
操守廉潔家宰特薦奉 旨陞江南道御史條奏請
廣試額敬陳未議疏俱蒙 恩俞允巡視東北二城
不畏強禦不事請託居民頌之丙戌會試監試外簾
掌登聞院管理鼓廳事蒙 恩賜人參綵緞辛卯卒
於官祀鄉賢子淑郡戊子舉人已丑進士武昌知府
淑棋戊子兄弟同榜舉人巴東知縣

王定柱

號椒園生而端毅孝友天成資稟尤異五歲時
授經書十行俱下過日輒弗忘十五入泮從父正準
入都下帷攻苦每一藝出同人爭傳誦之乾隆丁酉
舉於鄉時年十七家居侍養博覽羣書兼通醫理授
徒家塾因材善誘弟子謹身寡過守繩墨不敢踰庾
戎成進士辛酉選雲南師宗令既蒞任興利除弊判
獄明決大吏廉循名調任麗江地多裸夷以誠信感
孚之遐邇通帖然漢夷無擾丙寅擢他郎通判兼權黑
鹽井提舉悉裁陋規重恤商灶井故無志乘考厥源
流臚其廢墜修志如郡邑又修萬春書院拔士之秀
者陶育之合井謹呼頌之己巳權鎮沅知州也

貧而風俗特悍練首馬佑偽稱大元帥聚黨千餘人
將為亂計擒巨憨換其黨羽大患悉平旋擢思茅同
知地處極邊據九龍江為險江以外隣夷與緬甸兵
戈相尋往往擾及內地馳書勸諭俱羅拜無異心甲
戌權守永昌丁丑權守開化平亂恤民二郡大治庚
辰擢四川成都府以滇員領全蜀首郡破格用人曠
典殊恩百年未之有也蒞任後振刷頽風平反庶獄
不數月紀綱整肅壬午陞川東道署在重慶踞川江
之南商賈雲集與知府花總兵余和衷巡緝帆靜波
恬商民樂業丁亥卓薦入都輕裝北上至山西授山
東鹽運使東網疲弊有年矣蠲繁費籌調劑舉積弊
而更張之商力既紓而國帑無絀居二年調兩淮鹽
運使未履任擢浙江按察使綜核庶獄事必親裁會
秋審案積繁多手披日覽不遑暇食積勞遭重疾卒
於官天性醇篤淹通經史窮理盡性貫徹本原任牧
令薦厯顯秩廉潔自持無疾言遽色遇難處事亦以
從容應之每接僚案謙抑自下議公事必侃侃而談
著有鴻泥日錄大學臆測古中庸臆測從政餘談周
易瓊箋老子道德經註解金剛心經註解闢妄扶統
錄六壬註釋等編

宋仁宗賜觀文殿大學士禮部尚書王舉正不

允詔

歐陽修

夫朝廷之廣大賢雋之衆多必有皤然耆壽之臣以當上所優禮之異或事思所訪則有老成俾時王式瞻以爲人望故禮雖七十猶有不得請者焉卿懿文高行有君子之風清節合聞爲當世所重圖書秘殿日侍清閒進讀經筵坐論道德固非有百司之責筋力之勞宜思少安副我眷待

對皇太子問政箋

宋李至

伏奉手書猥賜下問夙夜尋繹喜與憂並何則至常

人也識不足以經遠學不足以待問才不足以幹事
智不足以周身而殿下目之爲碩儒曰可以發蒙號
之爲端士曰可以延譽得不憂乎殿下忠孝之道貫
於神明温文之德彰於天下而猶虛懷訪問思所以
分君父之憂以元元爲念且曰一夫或致於向隅千
里將疲於觀政此乃聖上有浸漬生靈之澤感動天
地之德致使殿下興言及此實社稷之福而億兆之
幸得不喜乎然則愚者千慮必有一得若夫自古太
子養德東宮不觀外事惟問安視膳而已固亦宜哉
而黎庶之疾苦稼穡之艱難素所未覩自非生知之

異天誘其衷莫得而知矣噫事有背經而合道時有
適變而從宜是以五帝三王不相沿襲聖上知其然
繇是以浩穰之務獨命殿下總其綱要而躬決焉殿
下復能欽若聖訓率由舊章馭吏民必以誠待叅佐
必以禮慎命令必以簡察獄訟必以情恤鰥寡必以
仁抑豪猾必以法杜讒佞必以正絕邪僻必以道有
一於此猶爲善政况兼是數者乎而猶曰奉車苟賜
於指南爲政何慚於拱北不亦過謙乎然則至雖不
敏竊常讀易見羣爻稍過必有悔吝惟謙象獨亡是
知謙之時義大矣哉願殿下守之而已勉之而已如

此則何正言不入何正道不行若正言入而正道行則生民不泰未之有也政化不治亦未之有也輒因問及輕肆狂瞽僭易之罪安敢逃焉

續座右銘

宋李至

短不可護護則終短長不可矜矜則不長尤人不如尤己好圓不如好方用晦則天下莫與汝爭智撝謙則天下莫與汝爭強多言者老氏所戒欲訥者仲尼所戒妄動有悔何如靜而勿動太剛則折何如柔而勿剛吾見進而不已者敗未見退而自足者亡爲善則遊君子之域爲惡則入小人之鄉吾將書紳帶以自警刻盤盂而過防豈如長存於座右庶夙夜之無忘

桃花犬歌呈修史錢侍郎

宋李至

宮中有犬桃花名絳繪圍頸懸金鈴先皇爲愛馴且異指顧之間知上意珠簾未捲扇未開桃花搖尾長生至夜靜不離香砌眠朝饑祇傍御牀餽彩雲路熟不勞牽瑤草風微有時吠無何軒后鑄鼎成忽遺弓劍弃寰瀛迢迢松闕伊川上遠逐龍輶十數程兩皆漣漣似垂淚骨見毛寒頓憔悴萬姓見者倍傷心微物感恩猶若是韓盧備獵何足嘉西旅充庭豈爲瑞

聞君奉詔修寶錄一字爲褒應不曲白魚赤鴈且勿
書願君書此徵浮俗

宋仁宗賜李至辭太子師傳禮批答

朕旁稽古訓肇建承華用選端良資於輔導籍卿宿
望委以護調益將勗以謙冲故乃異其禮數勿飾當
仁之讓副予知子之心

送梁鳴泉赴河南觀察使道省觀

楊博

藉藉梁京兆提刑入豫州十年趨禁闥萬里問遐陬
清望開嵩嶽高名動斗牛會看前席召早晚下龍樓
十月離亭晚霜清月更明梁園難久滯燕邸故多情
正色同司馬雄辭類長卿中山家慶畢鴈歸早傳聲
出征詩奉贈梁開府鳴泉 歐大任

翩翩晨風翼東北浮雲馳策馬黃河流敢言渴與飢
結髮在戎行從征復何辭穹廬積霜雪曠野明星垂
臨河斂冰澌千里還電飛敵愾我所懷中心當告誰

遼河日以陰下營亦何長匈奴十萬騎士蠻狡而狂
幕府肅戰征威震及遐方清野盡收保師行遂張皇
一軍薄鞍山一軍馳晉陽定策擣其壘戈甲耀日光
出塞二百里努力事戰場刃首殆千級殺氣天蒼茫
海北三四州分旗掃邊疆凱旋旆言入露布歸明堂
銘勲勒崔嵬彤弓受言藏丈夫志萬里詠言增慨慷
飲馬長城下雪深冰愈寒從軍樂從誰歌舞出薊門
我公受斧鉞推轂大將壇煌煌麒麟袍峩峩獅豸冠
鼓行急先登由令獨取殘中權 冰前茅沙河川
烏占楚幕空鸛鳴感東山一言挾纈温投醪萬人歡

如林託後乘同心諒非難振旅論奇功麟閣永不刊

賜麟堂歌爲制府梁夢泉作

邢侗

萬竈雲屯鼓角張漁陽組練曳明光羽書飛捷長楊
館宮錦頌恩出上方

題梁尙書賜麟堂

許儻

聞道天邊瑞應來百年畫錦此堂開裴公原係安危
望郭令仍兼將相才遼海清風歌九曷常山明月陰
三槐漢家麟閣無勞羨自有高門接上台

過恒山梁乾吉招飲

吳國倫

三月燕南花未開恒陽立馬正徘徊因君一奏瀟湘

賦把手還臨望漢臺同舍十年俱去國各天一夕好
銜杯止應左掖雙梧樹曾識當年諫獵才

春日過梁太宰別墅

背郭堂開水竹居東山僕射舊吾盧高門故倚陶潛
柳小艇能供張翰魚楹外滹沱光拖玉林邊恒岳對
懸車春郊使節尋遺老江漢無令歲月虛

壽許封翁七秩

林可

一自投簪返故廬翛然物外見盈虛避名應是同莊
櫟抱道何曾解佛書人在泮宮思永錫客從瀛海問
仙居清郎慙乏千金壽止托丹青頌九如

喬國華

香漢今承紫誥封斗山雅望重儒宗齋壇夜雨繁桃
李錦序東風畫鶴松卽見郎君新賜笏况兼孫子近
乘龍仙闈白髮春長健歲歲年年樂事重

史繼志

廣文官冷鬢如霜拜慕恩封亦省郎怪的於今同鶴
健赤鳥仙子是旌陽

阿翁桃李舊時春令子郎官不厭貧千歲靈椿一枝
桂燕山秋色太精神

送許益齋備兵雲中

楊綵

起草當時漢將名朔方曾借領專城雄才未盡長纓
請絕塞惟聞大樹聲萬里秋風懸遠戍百年邊事幾
知兵遲君開府乘年少談笑應教瀚海清

許益齋年兄開府鄖陽奉別二首有序

鄭洛

余與益齋公同年兄弟二十七年所矣已卯冬
余領制陽和明年春公來兵備朝夕共事交益
歡無何公忽奉鄖陽命爲邊人疏留不得也悵
然賦此見意

桑梓翩翩鴻鴈行何來關塞共飛揚朔方喜得同心

侶南國驚分一翼翔歲暮孤踪翻自覺雲中歧路總
相望知君到處留高調白雪陽春滿帝鄉
龍荒幾載重鴻猷忽借旌旗擁上游自是九夷歸欵
貢故令三楚見風流太和絕頂堪舒嘯江漢中央好
放舟無那雲山共瞻望何年吹角到邊頭

蔚州南發別許中丞

十載同心天際游開筵無那正逢秋躊躇歧路關山
暮搖落邊風草木愁千乘來臨爲重別一樽繾綣竟
難留欲知此後相思處試看桑乾日夜流

冬初送少宰大兄予告歸里

梁清標

拂袖燕關曉冥鴻息羽翰維摩初示疾疏傳早辭官
北闕絲綸渥東郊竹樹寒太行從面起捲幔雪中
看

八座歸田早爭看去國榮登車知病減解組覺身輕
松菊柴桑業蕤鱸張翰情人生鄉土樂到日自清平
兩年書再上今喜遂烟霞共羨天官福仍同處士家
晴窗探藥裏春雨養穠花爲視加餐飯無須勾漏砂
余懷同倦鳥惆悵送兄歸林壑無繒繳簪裾有是非
夕陽樽酒罷落葉驛亭稀不及南樓鴈相呼結伴飛

寄少宰兄村居

西園十畝不聞喧此日滄洲道自尊閒鷺窺人青雀
舫老農荷杖白雲村豈同陶令辭彭澤翻學龐公入
鹿門共約烟霞兄獨遂始知謫宦是 君恩

春日送光祿兄侍養歸里

送兄曾未幾又見促歸裝 錫數恩波重承歡歲月
長晨光開古驛柳色動春塘修竹吾廬近應先辦鶴
糧

一堂榮五代綵袖傍花前明月吹笙夜春風載酒天
不貪朱紱貴猶補白華篇元髮親猶健三公詎足賢
久有尋真約今乘薄板車世爭誇畫錦仙自號樓居

紫氣關中駕丹砂洞裏書黃精當手斲服食竟何如
巾車春雨後花發古雕邱泛月宵乘舫看山曉上樓
驥辭驚馬迹鴈足稻梁謀無恙韓溪水相親有白鷗

秋日憶兩兄家園之樂賦寄

千頃玻璃萬樹蟬幽人夜傍水村眠客來載酒溪樓
上十里芙蓉月滿船

里門留別二家兄次原韻

聖朝格遠海無波 詔許歸藩下馭娑 漢殿名 鴈羽分
行秋色迥珠江弭節瘴烟多客中賦就哀王粲臺上
風高憶趙佗此日聯床難索醉何梁衰草滿平坡

侍親為郡幾經秋五嶺重過識舊游香發荔枝曾一
飽露垂橘柚憶千頭殘碑亂後雲光在畫舫停時海
氣浮計日歸來松徑裏春宵風雨話神州

寄安之內兄備兵榆林兼司餉

西陲憲府自崔嵬吹角軍門領外臺榆塞尙懸秦月
小蠶叢會見蜀山開久推幕下籌邊略新識關中筭
餉才烽燧不驚間士馬葡桃春醉夜深杯

王安之參藩大梁便道歸里寄懷

萬里勲名達帝闈喜從故國駐魚軒大藩新擁中原
節畫錦重開北海樽辛苦十年淹遠宦艱危七尺答

深恩夷門舊日多游俠爲訪於今尙幾存

風霜飽歷歲時殘擁傳歸來父老看曾否鬢鬚別後
改依稀梁月夢中難花開趙苑晴烟細馬度黃河春
草寒念我羈栖遲把袂能無翹首憶長安

壽大宗伯叔父時奉 召候補 梁允植

八座還朝尙黑頭鳳池草制暫淹留喜逢暇日裁封
事好待宣麻 聖主求

燕山抱膝意徜徉雪綻梅花小閣香莫羨中丞爲亞
相洛中司馬自平章

正定縣志卷三十七

武功

正定當燕趙之衝踞畿輔之脊山河雄壯士馬精強
士生其間莫不慷慨悲歌殺敵致果干戈擾攘之際
削平禍亂自奮功名偉烈英風後先輝映不僅關西
出將已也自順平侯漢末樹績接武關張宋元以來
名將輩出足爲山川生色閭里增榮有明文獻無徵
事多缺略詳加搜集補闕拾遺而疎漏在所不免至
國朝則才兼文武勲紀旗常繪像凌烟可與衛霍之徒
爭烈矣詳加紀載凡有殺賊立功者亦附入焉

漢

趙雲

字子龍本屬公孫瓚瓚遣漢昭烈為田楷拒袁紹雲遂隨從為昭烈主騎及昭烈為曹操所追於當陽長阪棄妻子南走雲抱幼主保護甘夫人皆得免難遷為牙門將軍昭烈入蜀雲留荆州昭烈自葭萌還攻劉璋名諸葛亮率雲張飛等俱沂江西上平定郡縣至江州分遣雲從外水上江陽與亮會於城都城都既定以雲為翊軍將軍建興六年亮出軍揚聲由斜谷道曹真遣大眾當之亮令雲與鄧芝往拒而身攻祁山雲芝兵弱敵強失利於箕谷然斂眾固守不至大敗軍退貶為鎮軍將軍卒諡順平侯

五代

王環

以勇力事孟知祥為鳳翔節度使周世宗遣王景向訓攻秦鳳山數為環所敗大臣皆請罷兵世宗決意攻之成階二州相繼降周獨環堅守百餘日後克之世宗召見環嘆曰三州已降環獨堅守吾數以書招之而環不答至於力盡就擒雖不能死亦忠其所事也用之可勸事君者乃拜環右驍衛將軍

後征淮南使環將水戰卒數千自蔡河以入淮環遇疾卒於泗洲

宋

高懷德

字藏用周天平節度使行周子晉開運初遼人侵邊從行周北征至戚城遇遼軍被圍數重懷德左右射縱橫馳突眾皆披靡挾父而出以功賜裘帶名馬以寵異之太祖時行周卒召懷德為東西班都指揮使從征太原劉崇以功遷鐵騎都指揮使又從征淮南南唐將劉仁贍據壽春舒元據紫金山置連珠砦為援以抗周師懷德夜涉淮遲明賊始覺來戰懷德以少擊眾擒其裨將以還屢遷北面行營馬軍都指揮使宋太祖即位拜殿前副都點檢移鎮滑州李筠叛上黨令懷德與石守信進攻破筠眾於澤州以功遷忠武軍節度使檢校太尉太平興國三年從平太原改鎮曹州封冀國公七年改武勝軍節度卒贈中書令諡武穆

楊廷璋

家世微賤有姊寡居京時周祖微時欲聘之姊不從廷璋往見周祖歸謂姊曰此人貌異常不

可拒姊乃從之周祖從漢祖鎮太原姊卒留廷璋給事中出討三叛入平國難廷璋屢獻奇計卽位追册姊爲淑妃擢廷璋爲右飛龍使廷璋固辭不拜願推恩其父洪裕卽拜洪裕金紫光祿大夫正定少尹廷璋歷皇城使俄爲河陽知州事涇帥史懿稱疾不朝周祖命廷璋往代之將行謂之曰懿不就命卽圖之廷璋至屏左右以詔書示懿諭以禍福懿卽日載路俄聞周主崩廷璋嘔血不食者數日世宗立拜右驍衛大將軍充宣徽北院使征劉崇以爲建雄軍節度在鎮數年頗有惠愛前後率兵入太原境并人棄沁州二百里退保新城會陽州刺史卒遣監軍李謙溥領州事謙溥至并人來攻其城議者以爲速救之廷璋曰隰州城堅壁完并人奄至未能爲攻城具當出奇以破之乃募敢死士百餘人許以重賞由間道遣人約謙溥爲內應旣至卽叩枚夜擊城中鼓譟以出并人大潰追數十里斬首千餘級世宗詔褒之加檢校太保顯德六年夏率所部入河東界下堡砦十三降巡檢使靳勗等三宋初加檢校太尉吏民謁闕請立碑頌功德太祖命盧多遜撰文賜之李筠叛潛遣親信使齋蠟書求援鄰境廷璋獲之械送京師因上

攻取之策卽下詔委以經略及車駕親征詔廷璋率所部陰分賊勢賊平歸鎮改鎮邠州名爲上將軍卒廷璋好修容儀雖見小吏未嘗懈惰善待士幕府多知名人在晉州日鈐轄荆罕儒欲圖廷璋廷璋推誠待之殊不設備罕儒亦不敢發終亦無患議者以廷璋在涇州保全史懿陰德之報

趙延溥

父勗檢校太尉以父任補左班殿值開寶初大

牙軍轉殿前散員指揮使太平興國三年從平太原

略地燕薊六軍扈從有後期至者帝怒欲置以法延

溥遂進日陛下巡行邊陲以防禦外侮今契丹未殄

而誅讎將士若舉後圖誰爲陛下戮力乎帝嘉納之

師還遷內外馬步軍都軍頭領本州防禦使累遷副

州觀察使判冀州歷知貝州卒贈天德軍節度使

葛霸初仕太宗於藩邸補殿前都指揮使累遷鎮州

霸與石保吉同來觀卽日以霸爲冀州高陽關前軍

都部署屬北邊有警眞宗議親征以霸爲駕前西面

喪當過音樂請停迎授之制奏可是年冬以霸久典
兵年且老罷軍職授昭德軍節度并代都部署未幾
徙知耀州霸雖懦然能謹直自持卒贈太尉

劉昌祚

字子京以父賀戰沒錄為右班殿直元豐四年

為涇原副都總管王師西征詔與總管姚麟率
蕃漢兵五萬受環慶高遵裕節制令兩路合軍以出
既入境而慶兵不至昌祚出挾兩盾先登夏人少卻
師乘之斬首千七百級進次鳴沙川取其窖粟遂薄
靈州城未及闔先鋒奪門幾入遵裕馳遣使止之昌
祚曰城不足下脫朝廷謂我爭功奈何命披甲勿攻
是夕遵裕始領環慶兵距城三十里而軍遇敵接戰
昌祚遣數千騎赴之遲明賊已退遂謁遵裕怒欲奪
其兵付姚麟麟不敢受乃已明日遣昌祚巡營凡所
得馬糧悉為慶兵所取至渭州糧盡士卒爭入無復
行伍坐貶永興軍鈐轄明年復徙涇原加龍神衛都
指揮使知延州時永興方陷士氣不振昌祚先修馬
政令軍中校技擊優者乃給馬自義合至德靖若綿
亘七百里堡壘疏密不齊烽燧不相應昌祚度屯成
險易地望遠近事力疆弱立為定式上諸朝夏人寇

塞門安遠若拒破之殺其統軍葉悖麻咩叱哩二人
圖其形以獻帝喜遣近侍勞軍哲宗立為馬軍殿前
都虞侯渭地宜牧養舊時弓箭手人授田二頃有馬
者復增給之謂之馬口分地其後馬死不補而據地
自若昌祚按舉其法不二年耗馬復初又括隴山間
田得萬頃募士卒五千別置將統之勁悍出諸軍右
朝廷歸夏人四砦昌祚以為不可遷殿前副都指揮
使歷武康軍節度使卒諡端肅昌祚氣貌雄偉最善
騎射箭出百步之外夏人得箭以為神持歸奉之所
著射法行於世

高

化

字仲熙少沉勇有力不事耕稼學擊劍善射契
丹犯河北應募轉餉飛狐口楊業留戲下使捕

賊酋大鵬翼獲之會真宗為襄王尹京兆命巡內外
八廂戢獲姦盜甚眾盜有遺化金帛者化弗受累遷
武安軍節度使知滄州未行改相州部有大獄已具
皆當論死化疑之遣移訊果出無罪者三人踰年以
右屯衛上將軍致仕卒贈太尉諡恭莊

元

孔元 驍勇有智略棄家從軍隸丞相史天澤麾下從

卻敵歷攻泗州五堂山寨樊西堡俱俘其眾以獻中

統元年扈駕北征宣授管軍總把至元十一年從南

征為前鋒所向克捷進武義將軍從討叛王失理木

等從行院別乞理迷失追其眾至兀速洋而還分軍

之半扼其要害地餘眾遂潰獲輜重牛馬帝大悅加

宣武將軍右衛親軍總管子鷹揚至元中襲昭信校

尉右衛親軍孫成祖至大初襲昭信校尉右衛親軍

曾孫那海延祐中襲昭信校尉右衛親軍

崔彰德 世祖時以戰功歷兩淮江浙轉運使諡桓靖

明

朱得真 山東臨清州人洪武十九年以孝行徵授刑科

給事中因省親逾限革任三十一年靖難兵起

赴北平投効隨征滄州東昌有功復職三十四年隨

征戰滹沱河單家橋無極有功授保定府同知三十年

五年以守城有功陞授保定衛指揮同知永樂元年

調正定衛宣德元年調赴阜城修理席殿八月漢王

高煦反於樂安以金鑲玉靴刀袞龍衣招降得真星

夜赴京首報奉旨陞指揮使賞鈔一千貫衣一襲

馬一匹隨駕親征立即平定

丁祥 滁州人大同衛鎮撫洪武中從宋國公馮勝征

成衛指揮僉事從房寬戰濟南滄州白溝河東昌屢

有奇功又從房寬攻夾河水西寨東阿東平靈壁又

-5 215 45 905" data-label="Text">

破泗州錄功尤多陞指揮使以入金川門首功改授

正定衛戒飭謹嚴政令肅著吏民安堵

朱忠 襲指揮使守備德州正德四年八月追流賊劉

六等對敵被賊射中左肩奉旨朱忠到任三

五日乃能奮勇殺賊身被重傷勤勞可憫陞都指揮

僉事七年隨都御史彭澤出師河南將賊首賈禿兒

-5 215 45 905" data-label="Text">

一枝捕滅得賞功牌又將賊首趙風子一枝剿殺盡

絕七月又隨彭澤追賊首劉七齊彥名於蕪湖瓜州

鎮江府等處賊船遭風漂沒全股肅清賜表裏銀牌

陞指揮同知

梁勲 性忼直無私好喜讀書知大義以時方多事乃

棄帖括事韜鈴嫻騎射丰彩儒雅不涉行間氣

習三中武榜起在浮圖峪守備以功陞昌鎮游擊昌為明陵寢之所瑞宦驕橫每多抵忤因以疾告歸

顏彪

漢顏良之後祖忠從張士誠起兵吳平投誠太祖授以百戶父璟襲百戶以功擢大河衛指揮

使守禦開平改永平衛調正定衛遂為正定人永樂時從征阿魯台擒其渠魁俺答海出入矢石間茂著勲績卒贈驃騎將軍都督僉事彪幼襲父職以勇略聞正統十四年土木北狩邊鄙震驚奮勇從戎屢却敵騎功在邊關鎮守易州當紫荆之衝智略英明才猷果敏擢右叅將都督僉事鎮守北邊景泰七年其母趙氏卒特遣行人黃重諭祭以示褒嘉天順二年以總兵官鎮守兩廣時兩廣盜蜂起所至破城殺將諸將怯不敢戰多殺平民冒功民相率從賊久無功彪與巡撫葉盛破賊砦七百餘所頗以濫殺致謗五年鎮守廣東中官阮隨奏大藤峽緝賊出沒兩廣為患累年邇來逾甚雖常會兵勦捕緣地理遼遠且兩廣軍馬不相統屬未易成功宜大舉搗其巢穴庶絕民患乃命彪佩征蠻將軍印調南京江西及直隸九江等衛軍隸之六年彪奏臣率兵追勦大藤攻破七百二十一寨斬首三千二百七十一級復所掠男女

五千餘口賜救獎之

劉甯

其先山陽人寓居正定遂家焉襲世職為永甯衛指揮使勇悍善戰自以冗散無所見會延綏

用兵疏請效死尚書白圭許之屢以功遷都指揮使充宣府游擊成化十八年戰塔兒山有功進都督僉事改左叅將分守陽和秋亦斯馬因入大同總兵官許甯分遣甯與葉昇營西山自將中軍擊之夏未莊敗績甯與昇被圍數重幾陷亟發大礮擊之圍乃解無何復入掠甯將兵三千遇之聚落店西連戰敗之復敗之白登柳林又追敗之鶉鴿谷超遷都督同知改左副總兵協守大同與周璽並著功北邊稱名將宏治三年佩平羌將軍印鎮甘肅其冬寇犯涼州與戰抹山墩擒斬五千餘進右都督明年與巡撫許進襲土魯番於哈密冒雪進兵牙蘭先遁擒其妻女收復城池而還以功進左都督甯有胆智為大同副將時入貢者數萬人懷異志甯率二十騎直抵其營眾駭愕有部長勒馬引弓出甯前下馬與諸部長坐舉策指畫宣天子威德一人語不遜甯摑其面奮臂起其長叱之退甯復坐與語呼酒歡飲皆感悟卒如約

嘗仿古番上法以五十八人為隊隊伍重為陣建五色幟又各建五巨幟於中軍中軍幟起五陣各視其色應之循環無端每戰用是取勝卒贈廣昌伯諭祭

劉國柱 甯四世孫襲指揮使歷陞大同都司石匣游擊

大清兵薄京師樞輔孫承宗急敕游擊尤岱以騎卒三千赴援旋遣國柱督軍與岱合以功加左都督

白邦安 其先開平人遠祖六十從太祖開基身經百戰成祖封北平授燕山護衛試百戶靖難之際

屢建奇勲南克荊州北征阿魯台功績尤著進萬戶授指揮僉事世襲子台密英勇謀畫有光先烈正統景泰間為邊將所向克捷以功賜姓白名玉南平荆楚北定榆林延綏歷陞都督僉事以副總兵鎮守廣西卒於任祖璽襲指揮使子璋襲前職嘉靖七年改正定衛遂為正定人子春孫繼勲俱襲前職繼勲生邦安生而頤哲虎頭猿臂能事其業事親至孝處友多義秉賦忠貞蓋天性也及視衛篆恩威並濟官軍感戴上台交章薦舉擢沿河口守備沿河去輦轂方百里為陵寢肘腋重地當宣大咽喉守禦森嚴功勳

赫濯陞遵化左營游擊地當衝要責任益艱秣馬枕戈內修外攘胡馬不敢闌入時撫順開原鐵嶺相繼失陷海內勁旅援遼雲集當事稔其賢檄守遼陽兩易寒暑日夜乘障日不交睫愁營欲裂大司馬閱其積勞傷目也改調定州游擊修防薊鎮邊墻悉遵總戎公遺式板築如法勞勩上聞擢陝西河州叅將與利除害百事備陳設置為百歲之規選練賈三軍之勇戎虜欵塞民賴以安因目眚不任風沙致政回籍怡情農圃流連歌咏年七十一而卒子之胄年方二十餘弓馬為一時之冠披甲馳騎射金錢眼百發百中早卒之齊三科武舉以功授都司之崑兩科武舉正定守備加陞都司之鼎崇正丙子武舉龍固營守備

本朝

朱佩紳 順治戊戌武進士二等侍衛初任江甯前衛守

備騎雙馬射箭一時無有勝者調任昌平康熙十一年吳三桂叛於雲貴撫臣韓士奇保舉將才特授偏沅游擊隨征攻取九嶺平江等處冒矢石下戰

書移紅衣炮反轟吳逆營恢復醴陵縣軍中作歌表揚功績事平陞總兵

李維翰 康熙年間軍功官把總

劉元貞

性銳敏異常人胸懷磊落有卓越之才酷嗜鍾王法書摹之得其神髓郡名士咸稱之少長善騎射喟然嘆曰男兒貴早立名奚必毛錐子哉康熙己酉以武舉舉於鄉丙辰成武進士授山丹衛守備地處邊陲夙稱難治首禁科斂尙德緩刑十餘年邊人愛之暇時於書史無不究覽尤精於醫卜星相之術皆有深解多奇中

崔起潛

字際雲生時天大雪六七歲喜歌詠讀書聰穎尤工書法長多膂力善騎射文武並試得入武庠康熙辛卯壬辰聯捷成武進士崔氏自有明襲指揮使世著武功父以文學起家貢成均起潛雖登第父不以為喜曰何如進一文生教書家中可以小補雖武進士何用起潛自作表章親自書寫赴古北口迎駕投遞因家寒情願討一分苦差 上問家世甚詳又問此摺是誰給爾作的對云自作誰給爾寫的

對云自書即授以紙筆在机上跪寫此摺一字不遺即將兩摺付內侍云此摺可歸南書房又問能射箭否對曰能即安把三箭皆中 上云騫鷹清語即好的之謂授三等侍衛回鑾後 上與諸翰林在南書房議事畢 上云在古北口新收一武翰林即以此摺遍示衆云寫作俱佳 上命名起潛至云此乃翰林文人往來之地爾可為武翰林起潛謝 恩遂賞給南書房行走官銜賜觀二米墨迹書法逾進寵遇日隆雍正初放大同游擊歷陞衡州副將署永州總兵苗疆不靖叅奏前雲貴廣西總督鄂爾泰禱問進京事白旋里修家譜著射藝詳說詩集評定戚少保紀效新書行世詩集不傳惟傳世間好事惟忠義臣報君恩子奉親是應制之作臨終無大病天大雪捲簾起看雪復坐少待命家人扶持向北叩首畢倏然而逝

王原恪

天性孝友儻不羣好弓馬嫺韜鈴初應童子試縣府院三場皆第一中康熙癸巳武進士單騎接駕於古北口外天顏霽悅隨試弓馬特授御前侍衛雍正初 寵錫尤渥 賜花翎放專達放高

游擊卒於官

王榮遴

尚豪俠喜弓馬少人行伍即見知於制軍授以武職新河之變奮勇先登干刃偽將軍劉可大敘功加三等陞贛州都司不事詩書深明大義在任十五年軍民感戴為建生祠陞泉州游擊台灣參將卒於官兵民不忘塑像以祭兩地焚香歷世不絕

王榮業

陝西靖邊守備武勇有力而撫下以恩卸職而歸兵弁為之立碑以識遺愛

閻忠

原名振業由左營把總歷任天津守備擢京營參將出師金川殺賊立功陞陝西鳳陽副將

孫清元

晉州人入籍正定乾隆庚子武會元湖北襄陽守備調湖南城步守備陞貴州同仁都司六十年松桃廳大寨苗人石柳鄧不法勾結湖南永綏四川酉陽凶苗滋事清元馳往查拏立即撲滅正月湖南黃瓜寨逆苗石三保糾眾越境圍攻嗅腦城池清元馳往破敵二十七日苗匪攻圍松桃清元激勵將兵且戰且守保固松城賊眾數萬用攜牌雲梯晝夜環攻五十餘日雲督大學士福統兵自嗅腦一路剿

殺於二月二十五日至松清元即率弁兵出城接應

四面追剿立解松桃之圍捷聞 賞戴花翎以游擊

陞用嘉慶元年川督和題補平越游擊仍留松桃辦

理軍務十一月奉 旨統領貴州官兵剿除湖北教

匪二年隨將軍成川督福威勇侯額連次殺賊首先

跳溝直撲賊卡頭身俱受石傷裹瘡力戰勇不可當

捷聞 賞搬指荷包等物以副將陞用七月隨兩帥

攻擊腰帶崖用木梯繩索遞接密上力奪要隘迅奏

膚功捷聞奉 旨嘉獎九月從威勇侯額在建始縣

茅田雪崖頂交戰鎗斃逆首林之華轉戰恩施利川

所向有功陞安慶副將十一月由白崖口逼近朱寨

崖壁奪據賊卡勝受鎗傷三年五月隨威勇侯額在

南漳敗張漢潮在竹谿敗張添倫高均德張起貴李

淑等股匪四年七月在房縣連次打仗立解城圍又

生擒賊目陳允貴周奉潮湖督倭保加總兵銜八月

在壽陽坪紫草河馬良坪等處打仗殺賊無算又赴

紅山竹溪各邊卡堵剿高均德不令東竄荆襄陞襄

陽總兵十月辛聰等股在界外大甯屬之石壁山游

奕清元由尖山坪將賊擊退十一月徐天德一股被

川兵剿急竄入陝西鎮坪意欲赴尖山坪合夥逼近

邊境清元於界外馬鞍山迎堵分兵兩路夾攻殲斃賊眾不能東竄復折入陝五年正月在川楚陝屬連次擊敗樊人傑徐添德張允壽十二月於竹山途次丁內艱呈請歸葬奉旨仍留本任敕直督顏檢於藩庫撥銀五百兩派丞倅一員賚至孫清元族中交付親近之人妥為經理以示體恤十二月奉旨房縣土龕打仗孫清元首先馳射殺賊有功賞給騰啟克泰巴圖魯名號調鄖陽總兵湖提長奏該員在東湖抄截青黃藍三股教匪有功賞荷包等件湖督書奏該員在興山茅倫寨攻剿徐苟等逆有功賞鑲玉帶頭玉搬指湖督吳奏該員在熊藏山炮斃張允壽賞搬指荷包等件湖督吳奏該員在興山偏嘴山鎗傷黃號逆匪張萬林賞玉搬指瑪瑙烟壺荷包等件六年八月馳至巴巫界嶺擊敗樊人傑王曾七年四月於東湖霧渡河擊敗蒲天保又馳至房縣流星寨扼截樊逆將樊人傑殲斃餘孽殆盡七月於二竹地方擊敗陳查魏舒高姓等賊九月追賊至陝西白洵之梓木樹極賊管溝擊敗熊逆股匪師次七里關左足被驟踢傷損骨參贊德奏聞奉旨調永州總兵旋里補穿孝服八年四月服闋傷平赴永州任十三

年正月陞雲南提督奉旨查閱雲南營伍十五年正月調貴州又調四川提督卒於官

郭繼昌 師湖北四川甘肅殺賊捉生懋著勳績提督慶

將軍恆拔補把總干總守備六年經略額提補龍固

營都司八年凱撤回營九年引見奉旨調懷來

駕幸津淀五臺辦差勤慎荐陞宣化游擊陝西宜君

參將道光元年派赴喀什噶爾換防陞定邊安西兩

協副將六年派赴葉爾羌和闐換防行至阿克蘇逆

回張格爾滋事大臣長清請留阿城防堵八月十一

日賊匪數千從拖布罕地方偷渡渾巴什河繼昌帶

兵追剿殺賊數百名奪獲旗幟器械馬匹天暮回營

而協領都倫布都司孫旺被另股賊匪數千名圍困

營盤繼昌調兵半夜起行路遇掘濠阻路之賊全行

殺散即分兵衝殺解圍又帶兵追賊十餘里殺賊七

八百名落河身死者千餘名兵丁單存刺死賊首庫

爾班素皮捷聞奉旨賞幹勇巴圖魯名號記名以

三日追至洋爾巴特大獲全勝二十五日在合仔布
 依回庄渾水河橋布都爾回庄連獲勝仗追至洋河
 岸由子至寅帶領馬隊連擾賊營黎明繼昌潛赴上
 游躡流一湧而過衝撲賊隊所向披靡三月初一日
 追至喀什噶爾回城外繼昌帶兵急據城東北關帝
 廟要隘盡力攻擊層層逼近酉刻攻克東門入城剿
 捕擒斬張逆妻三名及其甥姪頭目人等喀城底定
 初三日帶兵收復英吉沙爾二十六日帶兵收復葉爾
 羌拏獲賊目安撫降眾四月二十九日會同領隊安
 帶兵赴卡外達爾瓦斯追擒張逆在塔里克打版山敗賊
 匪復赴藏堪一帶查拏張逆在塔里克打版山敗賊
 二千餘人擊斃紅衣賊目賊即退據山梁七月初八
 日繼昌帶兵山後埋伏初九日分路進攻繼昌由賊
 隊後兜擊一鼓殲滅捷聞奉旨交部議敘十二月
 二十一日聞張逆約布魯特回匪五百餘人由阿爾
 圖什回庄竄入大兵即行進剿該逆聞風出卡繼昌
 會同官兵跟踪追剿二十九日追至喀爾鐵蓋山首
 逆就擒紅旗報捷仍留喀什噶爾彈壓八年陞甯夏
 總兵調壽春總兵奉旨圖像進呈圖形紫光閣
 御賜贊語曰生於近畿拔於行伍屢立戰功我壯我

武臨陣督兵隨營俘虜俾鎮壽春張弓控弩入都引
 見蒙賜蟒袍荷包褂料克食等件調補延綏鎮總
 兵十年安集延逆回滋事檄赴喀什噶爾勦辦事畢
 回任委署固原提督十七年陞廣東陸路提督二十
 一年卒於官

武光琳

由行伍於嘉慶元年出師湖北轉戰陝西甘肅

八年凱撤回營十五年陞陝西延安守備十九年派
 往喀什噶爾換防八月回匪牧牙敦滋事光琳帶兵
 勦捕賊眾聚集山頂石矢交下光琳首先搶登山梁
 連殺三賊左肩被賊箭穿透拔箭復進連殺數賊又
 被賊以石塊打傷頭頂仍奮勇搶上山梁殺退回匪
 捷聞奉旨頒賜紅綠寶石翎管一個荷包二對以
 都司陞用並賞戴花翎二十一年陞臨洮都司道
 光二年陞陝督長出師西甯有功奉旨以游擊陞
 用九月陞俄卜嶺游擊三年委署西甯鎮標中營游
 擊張格爾滋事出征喀什噶爾攻打柯爾坪同眾帶
 兵殺賊三千餘名活捉數百名奪獲鎗炮器械甚多
 七年隨提督齊赴烏什換防二月與布魯特回匪在

志當山打仗殺斃三百餘名三月帶兵前征佳噶賴
一帶勦捕殺賊五百餘名五月於韋子墻地方拏獲
大頭目庫圖魯克並從賊十餘名揚威將軍長題陞
督標叅將九年署靖遠協副將出征喀什噶爾事畢
回營十三年陞督標副將性耿介不可干以私陝督
楊甚為器重陞肅州總兵引見調貴州威甯陝督
楊請留於西甯不得十五年卒於官

孔廣源

由行伍拔補外委嘉慶元年四月出師湖北六
月補順德營外委八月隨總統永保在棗陽縣

雙溝子打仗刀傷左面牙傷右手猶能奮勇殺賊十
一月拔補宣化鎮把總二年七月隨尚書惠齡在四
川太平縣田家壩打仗鎗傷左胸九月陞副馬關千
總三年二月隨西安將軍恆瑞在四川儀隴縣孫家
梁打仗石傷頭頂四年六月在甘肅階州老柏樹打
仗殺賊立功保奏賞戴藍翎十二月補漆水營守
備五年正月隨經略額爾次打仗奮勇出眾七年二
月補貴州凱里營都司九月大功告藏奉撤回營到
任九年五月引見實授八月雲督琅玕調換平遠
協都司十五年雲督伯麟保薦引見十六年奉

旨題陞古州鎮游擊二十一年奉滿苗民相安地方
安靜雲督伯保荐引見奉旨賞換花翎仍回本

任二十二年奉

旨題陞黎平營叅將

二十五年雲

督慶保以曉暢營伍出師著績題陞上江協副將道
光元年二月引見奉旨允準六年六月委署古

州鎮總兵七年雲督阮元保舉總兵正月引見奉

旨記名召見奉對奉旨回任八年七月奉旨陞授

鎮遠總兵九月陞

於家見奉旨回任十一年致仕卒

劉英魁

由行伍嘉慶元年出師湖北獲賊有功陞陝

西西安叅將因違上獲咎被叅出口十八年河
南滑縣教匪葛立業劉玉龍造反奉直隸總督温面
諭辦作賣藥之人私行訪獲單人獨力竟擒二人直
督保奏題陞廣平游擊山東東昌叅將年老告休

劉經

由行伍於嘉慶元年出師湖北轉戰川陝殺賊
立功拔補外委把總千總守備賞戴花翎陞
杜勝營都司

劉 綱 五年行伍於嘉慶元年出師湖北川陝又於道光

總干總守備都司賞戴花翎 陝西榆林游擊波羅

韓采玉 嘉慶元年出師湖北以功補肥鄉外委

高玉堂 廣平外委嘉慶五年出師湖北以功陞曲周把

高明堂 內邱外委嘉慶十八年出師河南滑縣打仗擒

賊奮勇出力以功陞涑水縣水東營守備貴州

胡清泰 世襲雲騎尉署右營把總嘉慶十八年出師豫

東殺賊捉生屢蒙優賞道光八年補廣西撫標

守備十二年湖北江華縣緝匪趙金龍聚眾滋事檄

委富賀二縣防堵在富川拏獲奸細三名賀縣緝匪

盤均華在芳林渡滋擾帶兵剿捕以功 賞戴花翎

陞鎮安都司調平樂都司二十一年調赴廣東會剿

夷匪在佛山防守炮台以功陞福建撫標游擊

劉 瑛 世襲雲騎尉嘉慶十八年出師河南滑縣打仗

有功保賞花翎補茨溝干總

劉元慶 英魁子由行伍拔補督標外委把總道光七年

隨總督那赴喀什噶爾辦善後事宜卡外尤為

出力拔陞河間守備署河間玉田都司辦理奉天西

陵兩次大差記功獎勵十四年陞湖北提標都司鄖

陽游擊護理總兵及竹山副將二十九年陞湖北提

標參將咸豐元年陞湖南長沙副將署湖南提督積

勞有疾卒於官

閻恆瑞 世襲雲騎尉由山東青州守備陞廣東潮州

都司游擊在高州軍營擒獲逆首凌十八打仗

受傷陞督標參將 賞戴花翎又在羅定軍營打仗

腿受鎗傷凱撤回營引疾歸

高 棣 武強外委咸豐二年出師江南克復各處保陞

劉進魁 由行伍咸豐二年出師江南湖北陝西殺賊立

功保陞守備以都司用現任棗強外委

張雲城 左營外委咸豐二年出師江南有功陞獨石

潘永春

保定人父祥官正定守備遂入籍焉由行伍拔補臨城外委咸豐二年出師江南防剿逆賊三年

年由信陽州赴揚州破壘殺賊保賞六品頂翎五月由揚州追賊赴河南馳抵懷慶又隨欽差大臣勝

追賊至靜海打仗出力拔補督標把總克復山東臨清有功拔補河間千總五年由馮官屯隨固原提督

孔出師河南湖北七年署大城守備八年調大沽千總隨同副將龍汝元在北岸炮台轟擊英國船隻值

龍汝元陣亡軍心慌亂仍督軍鎮靜截擊親點大炮對準施放胆識俱優蒙僧王保奏超補大沽都司十

一月又隨僧王馳赴山東曹州剿賊獲勝賞換花翎陞天津游擊以功超補副將卒於軍

王臺旺

由行伍補新樂外委咸豐二年出師豫楚三年調赴揚州五月隨勝帥追賊懷慶山西及山東

等處五年隨固原提督孔追賊湖北河南駐紮信陽州六年陞新河把總七年陞深州千總八年正月帶

兵赴揚州堵剿復派往安徽蔣壩三河堵禦戰守有功十年保以守備用奏賞藍翎十一年三月調赴揚

州堵禦有功賞換花翎十二年奉撤回汛同治五年九月陞河間守備六年十月統河間練軍劉派

中營赴山東張秋防河十二月總督劉派追大股賊匪七年正月調赴高陽守城二月通商大臣崇調赴天津圍堵防堵閏四月卒於軍

張光輝

清風店外委咸豐三年派赴大名防堵因攻克臨清餘匪竄入大名境內盡力堵截殲除賞戴

藍翎陞娘子關王家坪把總十一年調赴威縣剿除教匪在館冠等縣打仗奮勇拔補千總同治元年署

復莘縣有功奉旨以守備用三月出師安徽潁州陝西同莘州打仗有功二年調赴開濮防剿奉旨加

都司銜捻逆蕩平奉旨以都司用歷署左營右營守備龍固營都司

閻瀛瀚

襲雲騎尉咸豐四年調赴大名堵剿有功蒙欽差大臣勝保奏賞戴藍翎十一年署左營

守備出師山西卒於軍

吳世耀

新河把總出師江南征張洛行有功加六品銜賞戴藍翎

趙有剛

右營把總咸豐五年出師山東江南打仗有功保加藍翎

劉 彝 由行伍拔甯晉外委咸豐六年二月調赴河南

戴七年五月克復方家集三河尖等處殺賊十一名

奏賞藍翎以把總用八月克復正陽關奏賞五品頂

戴八年四月克復六安州奏請以千總用十月攻克

牛家牌坊奏請以守備用九年奏撤回汎十一月調

赴景州防剿捻匪六月奉撤回奉汎七月委署固關守

備十月委署王家坪把總

孔憲武 左營馬兵同治六年三月派入正河練軍八月

隨固關參將趙在定州小樂庄與馬賊打仗面

受刀傷二處膊項受矛傷六處頭頂受刀傷一處左

膀受矛傷三處蒙正定鎮譚 賞給六品功牌九年

四月札委練軍副哨長五月因善操出力賞給五品

功牌十一月七月拔補龍固營外委

高 楷 右營千總固關守備同治元年出師山東攻破

館陶縣賞戴藍翎攻破莘縣保陞都司

張廣奇 由行伍於嘉慶元年出師川楚陝甘奮勇打仗

果敢有為以功歷陞朝陽游擊

鄭啟發 由行伍於嘉慶元年出師川楚陝甘摧堅陷銳

勇猛過人以功歷陞山西大同鎮都司

董積善 由行伍咸豐二年出師楚豫淮東江北三年三

月 在揚州駐營堵禦金陵逆匪北竄調浦口防

禦六年六月調揚州樸樹灣堵截八月收復江浦浦

口打仗出力保賞六品藍翎十一月攻克瓜州 欽

差大臣德保陞外委八年九月攻克揚州 欽差大

臣德保陞把總九年六月由揚州調皖省蔣壩扎營

防守河口禦敵奮勇十年八月 欽差大臣德保補

入溝營外委十一年六月 欽命督辦軍務都保以

干總陞用同治二年拔補元氏汛外委三年二月由

蔣壩調揚州北關法海寺堵禦四月補新城鋪外委

復調六合縣西門駐防十月因克復金陵奮勇打仗

欽命督理江北軍務富保以守備陞用四年三月撤

回到任七年閏四月捻匪竄擾天津 欽差三口通

商大臣崇調赴滄州防守減河圩墻嗣因直隸肅清

爵閣督部堂官保以都司陞用七年九月奉撤回營

仍回原任十一年八月調忠順營把總

閻得高 字超羣嘉慶元年由外委與兄得俊弟得賀出

師川楚陝甘於牛蹄灣陣亡賀於安坪陣亡

得高報仇雪恥奮不顧身大帥恐其兄弟偕亡也每

戰戒其輕進而忠勇憤激所向有功保陞左營把總

磁州千總八年凱撤賀屍被水冲失尋覓未獲攜俊骸骨旋里歸葬以慰忠魂時孀婦此離遺孤幼弱同居未分之產盡與兄嫂弟婦隻身赴任而歲時存問無間始終尋陞山東壽張營守備整肅營規軍民愛戴告歸卒於家

閻履亨

由外委於咸豐二年出師河南湖北江南三年

四月在揚州打仗擒賊記功五月隨大臣勝追賊由安徽河南入直隸在天津獨流打仗奏賞六品銜四年四月克復臨清打仗奮勇奏賞藍翎五年三月蒙僧王調赴湖北德安府進剿七月撤回九月因病歸營遲延革職十年九月因英國竄擾京師赴營投効十一年三月剿土匪出力大臣勝賞給外委加五品銜四月在直隸山東交界打仗奮勇拔補大沽外委同治元年正月隨大臣勝出師河南安徽陝西十月在同州打仗奮勇賞給把總二年六月拔補正定左營把總調署大沽右營干總四年五月管帶炮位赴直東一帶堵截擒匪又派在大沽駐守南岸炮臺五年因把守黃河出力奏加守備銜六年七月勅回本任七年九月調補獲鹿把總

閻恆榮

咸豐十年投効軍營三月在河南淇縣剿賊出力賞六品銜五月在歸德府打仗殺賊多名大臣勝賞戴藍翎以外委用八月與英夷打仗賞五品

銜十一年四月隨大臣勝赴直東剿捕賊匪六月克復莘縣賞給把總同治元年隨赴安徽四月解穎圍復駐壽州防堵七月調赴陝西九月在子午峪打仗面受牙傷大臣勝賞換花翎十一月拔補左營外委是月奉撤回營六年五月調無極外委八年四月因勦辦梟捻團防守城出力直督官奏加守備銜十一年調補甯晉外委十二年正月陞王家坪把總

閻恆庚

由行伍於咸豐十一年出師山東七月在莘縣

打仗奮勇賞六品銜同治元年隨大臣勝出師陝西在同州等處打仗有功賞戴藍翎十一月奉撤回營以外委用二年十月署龍固營把總現署棗強外委

閻恆森

由行伍於同治元年出師陝西九月在子午峪

打仗擒賊大臣勝賞給六品銜十一月遣撤回營四年三月調赴山東何城鎮防堵六年二月把守黃河出力直督劉賞給外委七年三月調赴直東進

鄴逆匪八年四月直督官奏請以把總用九年二月補晉州把總十一年七月調行唐把總

劉得力

咸豐九年十一月在天津縣投効海口打仗出力記名外委十一年五月收復山東莘縣賞給

六品銜同治元年從征陝西十二月撥入記名總兵杜勝營都司魏元祿營中効力二年三月隨隊攻破陝西喬店雷化鎮及渭南縣倉頭鎮等處回巢同朝一律肅清蒙大臣多保以把總陞用賞戴藍翎六月攻破臨潼縣新豐縣鎮及三府里一帶回巢及攻克高陵縣城復又攻破蘇家溝長駝灣渭成灣等處回巢隨同救援商州十月攻克山陽縣城扼守武關三年四月大臣廖保奏奉旨以千總卽補並加守備銜賞戴花翎自陝回楚六月進剿麻城縣髮捻各逆獲勝攻毀縣屬白果一帶賊壘九月大戰於黃岡縣新洲及十月追賊至孝感縣楊家河襄陽縣王家樓打仗獲勝四年駐紮襄樊棗陽隨州孝感等處扼堵五年正月攻克黃陂縣城二月攻破陡坡山賊營入九等月在光化縣老河口河南析川屬李官橋防堵十一月捻逆下由黃麻復犯鄂境隨同在荆門沙潭黃陂攝口等處迎頭堵截並隨隊助剿六年正月

至於四月在孝感四汛河漢陽新溝駐紮保固荆襄南岸並屏障漢鎮迭次猛戰克復雲夢天門應城等縣城蒙大臣官曾彙保以守備卽補加都司銜十年凱撤分發直隸在省候補

張

熙

熙字和春父用成以武舉投營効力任臨漳千總勞績提督慶保舉茨溝把總杜勝干總陞山西柳樹澗守備又調廣東守備以功陞浙江王家塘都司右營游擊告歸卒孫金梁出師潁州陣亡

丁

春

因父復興陣亡於揚州咸豐三年投効軍營派赴邯鄲大名高唐堵剿九年派赴江南宿州剿捕髮賊在板橋敵家圍子等處打仗蒙賞六品銜十一年在宿州追賊至清江山東等處殺賊立功拔補外委同治元年四月在徐州奶奶山甯山橋打仗奮勇保陞把總六年七月奉派練軍剿捕捻匪蕩平有功總督官保奏奉旨賞戴藍翎八年委署晉

州把總補遺

魏學禎

行伍咸豐三年五月出師懷慶八月追賊至山
 西直隸深州天津獨流靜海打仗有功四年正
 月追賊至東城二月追賊至阜城縣克復三村殺斃
 賊匪蒙欽差大臣勝賞給七品頂戴三月調往臨清
 打仗破城追賊至清水鎮打仗左肋受矛傷復追賊
 至豐縣全股蕩平復赴連鎮高唐馮官屯五年三月
 隨固原提督孔出師湖北德安府七月撤回歸伍八
 年九月派赴大名長垣防堵捻匪竄至龍門河口用
 炮轟斃多名蒙大名鎮阿賞換六品頂戴十年八月
 調赴上店口防守捻匪竄撲河口復將賊匪擊退蒙
 大名道奏保外委十一年正月奉撤歸伍同治三年
 拔補臨城汛外委十一年三月調阜城汛外委

宋哲宗賜劉昌祚免恩不許批答

卿國之虎臣帥我爪士總章大祀宿衛有勞宜為六
 軍之先以承大賚之慶辭而不有殊非吾心

趙子龍故里

劉秉琳

有譖子龍於昭烈者拋手戟擊之其君臣相
 得者豈偶然哉時人議以田舍分賜諸將子
 龍駁之其忘家忘身者匪直一將之膽也昭
 烈伐吳別傳載子龍之諫武侯伐魏後表惜
 子龍之亡當日在蜀固大有關係矣

荆蜀都聞將略長威聲一振自當陽心精早識真英
 主膽大原包小戰場諫上如逢法正在出師情與鄧
 芝亡成都盛日無田舍名並常山重故鄉

正定縣志卷三十八

政事

旬宣布化功在封疆爲守兼優望隆方面下至一官
 一邑催科撫字俱荷恩施社稷民人胥關經濟士君
 子學優則仕未有漫無表見而克稱任使者也正定
 人材輩出豐功偉績舊志所載焜耀簡編
 國朝澄敘官方宏敷雅化循良報最較之前代有過之
 無不及也詳加紀載後之人宜知所取法焉

宋

王舉元

字懿臣化基幼子以獻文賜進士出身知潮州
 江水敗隄盜乘間竊發舉元夜召里豪計事盜

既獲乃治隄為河套發運判官或言大河決將犯京師舉元適入對具論地形證其妄已而果然歷郡牧戶部判官京東轉運使沙門島多流人守吏顧貨棗陰殺之舉元請立監以較賞罰自是全活者眾徙淮南河東夏人爭屈野地舉元從數騎渡河與之議示以赤心夏人感服治平中又徙成都邛井鹽歲入二百五十萬為丹稜卓箇所侵積不售下令禁之鹽登於舊後知永興軍慶人夏人屯境上有窺我意舉元使二裨將以干騎扼其要害長安遣從事來會兵涇原戒勿輕舉大將竇舜卿銳意請行不聽舉元曰不過三日虜退矣至期果去神宗以細劄咨攻守策舉元請省官減戍益備去兵勿營亭障輿論不合遂引疾求解徙陳州未行而卒

王 詔

字景獻舉元子以蔭補官通判廣信軍知博州魏徐尚椎剽姦盜相囊橐詔請開反告並贖罪法以誘其黨元祐初言朝廷起回河之議未決而開河之役遽興河朔秋潦水淫民人流徙賴發廩賑贍稍蘇其生未可以力役傷也從之擢開封推官有富民貸僧牒身死資籍又錮其妻

金

女奚烈守愚

字仲晦正定路吾直克猛安人明昌中進士為臨沂令有不逞輩五百人結為黨大

擾境內守愚下車即散去蝗起莒密獨不入臨沂境先是括河朔山東地隱匿者沒入官告者給賞莒州刺史教其奴告臨沂人昌地積賞錢三百萬先給官緡乃徵於民守愚聞於戶部徵還之流民歸業縣人勒其事於石性至孝母死勺飲不入口三日終喪未嘗至內寢

馮 翼

大定人一作定州人父仲尹天眷初以進士起家仕至山東西路轉運翼字子美正隆二年進士尹無極慕宋令晁說之政志問山堂建整暇堂與利除弊祀名宦性剛果與物多忤用是仕

宦不進以同知臨海軍節度致仕居正定歿葬
三楊里之南遂為正定人有詩樂府行世子璧
另有傳無極縣志作始平人

馮璧

字叔獻弱冠補太學生承安二年經義進士制
策復優等調莒州軍事判官宰相奏留校秘書
未幾調遼濱王簿縣有和糶米未給價者餘十
萬斛散貯民居以富民掌之有腐敗則責償於
民民殊苦之璧白漕司即日罷之民大悅歷太
學博士至甯初忽沙虎弒逆遂去官宣宗南遷
遷翰林修撰時山東河朔軍六十餘萬口仰給
縣官率不逞輩竄名其間詔璧攝監察御史汰
逐之摠領撤合問昌秀四百餘口劾案以聞詔
杖殺之故所至爭自首減幾及於半初監察御
史本温被命汰宗室從坦軍於孟州軍士欲謀
變叛入太行於是樞密院奏以璧代本温竟其
事璧馳至衛責以大義將士慚服不日就汰者
二千人尋改大理丞與臺官行關中劾奏奸賊
之尤者商州防禦使宗室重福等數人自是權
實側目十月改禮部員外郎權右司諫時詔問

時務所當先者璧上六事大略言減冗事備選
鋒緩疑似以慎刑擇公廉以檢吏屯戍革朘削
之弊權貴嚴請託之科又條自治之策四謂別
賢佞信賞罰聽覽以通下情貶損以謹天戒累
遷同知集慶節度使到官即上章乞骸骨致仕

紇石烈德

字廣之正定路山春猛安人明昌二年進士
調南京教授察廉能遷厥次令歷遷肇州防
禦使宣撫司署提控肇州圍急食且盡有糧三
百船在鴨子河去州五里不能至德乃濬濠增
陴築甬道導濠水屬之河鑿陷馬奔伏甲其旁
以拒守一日兵數接士殊死戰渠成船至城下
兵食足圍乃解散遼東路轉運使軍民遮挽留
乘夜乃得去蒲鮮萬奴逼上京德與部將劉子
元戰卻之遷東京留守歷保靜武勝節度使興
定二年以本官行六部事三年以節度權元帥
右都監與左都監單州經略完顏仲元俱行元
帥府於宿州四年遷工部尚書未幾召還中都
是歲卒

元

張礎

字可用其先渤海人父範為正定勸農官因家
 焉礎業儒廉希憲薦於世祖潛邸從世祖征伐
 凡徵發軍旅文檄悉出其手中統元年立中書
 省以礎權左右司事歷改知威州時有婦人乘
 驢過市投下官暗赤之奴引鳴鏑射之墜地奴
 匿暗赤家礎將以其事聞暗赤懼乃出其奴論
 如法至元十四年立諸道提刑按察司以礎為
 江南浙西道提刑按察副使佩金符宣慰使失
 里貪暴掠良民為奴礎劾黜之遂安縣民聚眾
 負險為亂命礎與宣慰使劉宣領民捕之宣即
 欲進兵礎曰江南新附守吏或失撫綏宜遣人
 招諭以全眾命宣不可礎曰招之不來誅未晚
 也往諭逆黨果自縛請罪礎釋之宣乃嘆服遷
 嶺南廣西道提刑按察使宣慰使也里脫強奪
 民財礎按其罪拜國子祭酒尋出
 為安豐路總管卒於宮諡文敏
 張文瑞自天興之變各右武文瑞在軍日以文史自娛
 至元初授棠邑尹清介自律及代耆老遮留通

張文瑞

蘇志道

京師立總管府名為經歷益有聞遷同知濬州
 事首葺廟學振儒教一郡翕然稱治以疾終於
 州子淵延祐間亦知濬州兼
 管本州諸軍與善勸農事
 太祖時領北省郎中稱能吏子天爵另有傳

脫烈海牙

畏吾氏世居失拔里之地祖入刺朮始遷正
 定仕至帥府鎮撫脫烈海牙幼嗜學警敏絕
 人性整暇雖倉卒無遽狀喜從文士游犬馬聲
 色之娛一無所好由中書任龍平縣達魯花赤
 身賦興學勸農平訟橋梁水防備荒諸政無一
 不舉及滿去民勒石以紀其政拜監察御史時
 江西胡叅政殺其弟訟久不決脫烈海牙一訊
 伏其辜出僉燕南肅政廉訪事務存大體不事
 苛察在任四年黜奸吏百四十有奇名為戶部
 郎中仁宗在東宮知其嗜學出秘府籍籍以賜
 時人榮之母霍氏卒哀毀骨立事聞賜鈔五萬
 貫給葬事起為吏部尚書量能敘爵以平允稱
 出為荆湖北道宣慰使適峽人艱食先發廩賑
 之而後以聞朝議避之至治三年遷淮東宣慰

鄭大中

使卒於廣陵追封恆山郡公

初為納綿路經歷仁宗在東宮因事得見偉其其人曰左右問之略不自銜調吏部至事以廉敏為丞相器重除東平路推官人服其能時水災民多徙死承檄賑濟全活甚眾調嘉興路決獄詳明憲府薦其能召為吏部員外郎累官至奉政大夫

馮崧

壁孫秋官郎中渭子一名岫字壽卿中統建元

時入掾中書右部為郎故事諸曹出皆總管判官獨抑崧正定轉運經歷授衛輝總管經歷承事郎令正定之無極事治考最令洛之曲周升奉議大夫僉山南湖北道提刑按察司事歷官至山南湖北道肅政廉司副使至元二十八年卒年五十九子休復

明

馮雲輝

洪武初以儒士薦官至湖廣左叅政力學通經所至以才能著稱

王 玉

洪武中由太學生歷官山西按察司副使端謹有為時譽歸之

孫 敬

永樂癸卯鄉貢授山西廣靈知縣廉能有幹濟政績顯著時邊警不甯委督運糧儲兼理操兵日夜勤勞餽餉不絕兵部左侍郎王英力薦其功陞太原知府抵任邊餽正急復委之未幾以疾歸景泰元年詔舊職天順改元致仕

張 宏

宏治進士官御史以抗節出為蘇州府推官累遷右僉都御史巡撫榆林宣布威德軍民愛戴後致仕

楊 綵

嘉靖癸丑進士歷任華州冀州有治行遷刑部出知西安府考最擢雁門道旋授巡撫綵本虎賁右衛籍江西泰和人與正定梁太宰夢龍善遂入籍焉林居二十餘年家事清白子孫寒素六十三歲卒

王撫民

字仁甫嘉靖辛丑進士授戶部主事開封府推官陞臨清兵備道按察司副使撫民少穎悟既

長廉幹督理太倉銀庫會假銀事發疏請鑄官
銜及匠名於錠中以便稽查朝議躉之永為例
任開封時積案至三百件一再閱月寃滯並釋
郡人稱神君焉性恬淡食無重味衣無重帛廉
明有威人不敢干以私
後以勞成疾卒於官

馬政和

嗣伯授義十三歲游泮隨讀於陵川齋中伯故
扶柩歸葬泣血不忘舉於鄉歷知扶風六合等
邑有德政邑人
建生祠祀之

梁慈

吏部尚書夢龍三子補諸生有聲喜讀書樂從
賢豪長者游以父廕錦衣衛千戶與楊漣左光
斗高攀龍繆昌期友善每談古今忠義事娓娓
不倦羣起敬深交之神宗時每下廷臣詔獄歷
年不釋慈從獄中保護甚眾熹宗即位權漸
旁落璫焰將熾引疾歸足不履城市葺郊外不
蕪園以居多種樹稱樹
隱後璫禍起得免難

劉有餘

大興人從外舅楊綵來正定遂占籍為諸生登
萬曆己丑進士筮仕安邱令廉明守法深得民

心目力甚高評文鑑衡不爽陞松江同知端正
清操以不能事上官告歸初家貧從揚公山西
撫署讀書不輟楊姬妾隔牆詬之置若罔聞後
楊公知之以為必貴答其妾性抗直不詭隨故
未竟厥施

梁維基

夢龍孫少失怙奉節母李竭盡心力奮勉讀書
為文章入邑庠以祖廕入國學為上舍年及強
仕奉節母以終謁選為督府幕僚勤於其職陟
戶部員外郎筦餉通州奉公守法出納維均纖
毫不染指課績擢守南雄知府自奉儉素絕無
貴介氣為政務存大體不為苛細輕徭薄賦民
賴以醒盜賊漸興勦捕弗能禁單車詣壘宣布
恩威盜悉解散乃繕黌宮修教法進諸生與講
敦倫課藝之事士之貧者捐資以賑不數月文
教蔚興門下擢第者數十年不絕至訟平而狂
狴蕩然除奸而豪蠹屏息征徭弗擾商旅如歸
善政尤多秩滿歸田無復仕進意好飲酒彈棊
以自適卒
祀鄉賢

何迥秀

天啟辛酉舉人筮仕得秦中塾屋令邑風偷俗變其民好訐而尚狙詐租稅不入官者五六年矣視篆之初首詢民瘼有不便於民者輒罷之有益於民者咸舉之素性儉淡不樂侈靡粗衣糲食如韋布然是歲夏數月不雨禱於諸祠甘霖立霈秋以稔民歌有年尋調山東壽張人爲立生祠兼祀名宦後任太平有政績載縣志

許其孝

守謙子萬歷癸丑進士授河南南府推官才猷明練有冰蘖聲郡中礦寇竊發單車詣賊所開誠慰撫之衆干餘皆叩首屈服自是永無患乙卯聘山西同考以內艱歸服除補鎮江府推官時巡方御史闕十餘年矣甯晉馮英受命至積贖充棟付其孝剖決不旬日就緒英深器之辛酉充應天同考擢雲南道御史天啟中京兆庠冒濫殊甚其孝疏請澄汰宿弊盡革視饒淮楊搜積帑百餘萬上之詔獎忠勤加太僕寺少卿歸休十餘年以文史自娛年五十九以疾卒守謙子弱冠補諸生博涉經史微文疑義遇自卽了了兩應京闈試不第兄其德早卒襲父業

許其才

官生任池州通判詳明清介巡按易公課吏爲南中最著印石埭吏胥爲姦連年多有通賦獨勵飲冰操洞悉宿弊并前數令未完者一同起解南戶部莊公優獎焉遇衆以和僚友尤相善暇與太守胡司理周登齊山依韻唱和詩勒於石調順天府陞戶部主事管明智御馬草場易州糧儲遷郎中擢雲南尋甸府知府以病未赴任致仕歸天性慈良家居謝賓客無一字干公府邑令潘極重其人曾以禮敦請鄉飲亦不赴

梁士純

聰明過人博知古今事弱冠發憤讀百家書學爲制舉義清眞峻潔無蔓詞萬歷戊午舉於鄉連罷公車讀書冷然堂晨夕以古人相期許有過人之識絕人之才崇正辛未成進士除陝西涇陽令時值荒旱流寇雲擾選旅練徒百方備禦修城垣以資保障教戰法以簡諸生賊聞風遠遁涇士以安輕徭薄賦剪惡安良暴民屏息乃重學校正士風諸生執經問藝踵相接皆有以訓迪之不以爲煩調長安以艱歸服除補山東滕縣滕經兵火益稱難治抵任以治涇者治

吳周支

滕與利除害民既卒稅相與歡騰里舍以勞疾卒於官祀鄉賢方質有氣局形貌魁碩微有知即好學問龔指揮使中萬歷癸卯武科因官立事諸老將皆遜以為不及歷陞游擊實軍伍裕芻餉繩大慈清夙弊率諸將校實心修備滋久愈謹張中丞鳳翊振肅法紀深加委任移官津門值時事日非軍容肆惡遂引疾歸閉戶讀書縱學無不觀覽後乃專意經史論古賦詩雖纓組乎未嘗不縹緲也順治甲午卒於家

本朝

梁維本

夢龍孫博學強記思理深苦天啟辛酉舉人積學勵行其文鴻卓精實自成一言處家儉約然好施子戚里疾病患難貧乏輒賑之甲申賊陷京師踰月西遁餘孽在正定者思復逞維本力拒之遂破家大清定鼎以薦授中書舍人陞禮科給事中長身豐下有威重好面折人過入諫垣丰彩益嶽嶽每朝會諸公望而敬之所條陳皆關國家大計懇惻詳盡遷刑科戶科進督

梁維樞

禮科卒於官祀鄉賢

夢龍孫幼發憤讀書不屑為章句之學從趙南星肄業詩文俱有法度補諸生每試居高等萬曆乙卯受業於楊漣是年舉於鄉崇正丁丑內閣撰文闕人以文章楷法考天下士就試授中書舍人熟練朝章凡有大事輔政者必與商確細心贊助晝夜勤勞加尚寶丞掌典籍事未幾以不調東廠權璫為所構褫職事白復官陞工部主事甲申流賊寇都城守安定門城破被拘執本朝兵入掃蕩賊氛乃得解擢工部郎中丁艱歸里癸巳以薦起補原官丙申授山東武德道加意撫循鞭扑不用民自畏服清真自砥餽遺一無所受選兵務精給餉務厚中有驍健者拔為偏裨掃穴擒渠境內帖然理迷人之籍清徭役之則軍興旁午供頓不以纍民巡行運河漕艘得以早達善政種種民刻石頌之謝病歸好為詩與諸名士相倡和為風雅至盟字宗歐虞得楷法曾蒙 睿賞士大夫多以詩記其事卒祀鄉賢所著有玉劍尊聞姓譜日牋內閣

小識見君子日
賤等書行於世

張純熙

字晦先幼與梁清遠施肇元講業滄沱之上履
貞守潔自命不凡順治乙酉舉於鄉丙戌成進
士授鳳陽推官時江南貪黷之風甚盛獨一塵
不染清修卓識蔚州魏象樞極稱之漂陽陳相
國名夏言亦如是內陞主事轉御史出按廣東
清直有聲撫巨盜政績尤著陞四川兵備道調
雲南治績如司李江南時人皆頌

武士豪

字穎凡順治丙戌進士山西永和山東萊蕪知
縣兩任劇邑賢聲四著以不善逢迎甘心廢放
園林之樂高出尋常諸名士
皆與倡和相傳以為美談

施肇元

字長也幼治經生業與梁清遠張純熙相過從
賦性簡澹情好彌篤順治己丑進士授刑部主
事時清遠官吏部純熙以治績卓異官禮部日
相過從如故云擢知浙江紹興府內清明而外
清靜仍以簡澹
臨之有政聲

劉宏譽

生而穎異長而倜儻為文原本經術歸於大家
登順治己丑進士司理陽和聽訟臨民政崇寬
簡陽和舊無囹圄凡有罪人皆置土窖中日報
死亡宏譽惻然動念以為其中有罪不至死者
因捐俸修獄房三十餘間自此存活者不可以
數計旋丁外艱服闋補兗州矢公矢慎廉明有
聲山東省巨盜某財可通神被人訐告三十餘
款督撫命之審理盜挽人求宏譽嚴拒之竟置
於法人皆稱快丁內艱服闋補南雄兵火之餘
房屋僅存者無幾靖藩南下悉為兵丁所占民
訴之親詣靖藩陳其利害悉退還民既而大軍
入粵僱覓船隻事集而民不擾又清太平稅廠
積弊陞戶部主事督
理潯墅鈔關卒於官

何澄

迥秀子字誕登順治壬辰進士授瓊州推官分
房而得名元入巢而撫巨寇治行卓異召入諫
垣歷吏刑工三科都給事中嘉猷數告有直聲
典試入閩所取皆知名之士分巡川北招徠戶
口安集凋殘正色卻暮夜之金戎服消竊發之
警築城興學經畫周詳告歸旋里解紛排難周

梁允植

急扶危雅意作人成就後
學尤多卒於家崇祀鄉賢
字承篤以拔貢授錢塘知縣性明敏有幹濟甲
辰閩變總督李之芳移鎮三衢巡按田逢吉督
兵城守咸以允植為才命佐軍興調兵食支應
滿漢大兵解餉解火砲鉛彈軍器前後運用船
隻計萬有八千餘號夫役不計其數俱出僱召
民無怨咨遷袁州府同知題留以同知攝縣事
事平擢延平府知府

王原直

鍾麗次子康熙初以廩授太常寺典簿歷任甯
波府同知甯為海濱要口海船出入俱有常規
墨者多方需索原直一無所受又地通大洋賊
艘出沒無常猝不及防則恣其剽掠原直悉心
防禦鯨波頓息以才能陞福州府知府甫下車
省方問俗慨然以厚生正德為己任閩地環山
面海沃壤無多加以耿逆煽亂疆宇蹂躪瘡痍
未復原直清廉正直撫字多方旗人借民居栖
息久假不歸居民露處原直力請還之民福清
地多浮糧由來已久原直急清丈以減其賦古

王榮賜

田閩清荒山瘠壤正賦完納不前設法先墊以
紓民力治郡七載惠聲惠政深洽民心庚午以
公務解任郡人罷市數日不期而集者千人並
有裸體啣刀將以頭血濺地白原直寬者照磨
田玉璽狀請代繫 朝廷廉知其寃 命大臣
覆按得其實還原直舊職歡呼如得慈父母其
德澤之感人如此
復任逾年卒於官

原直子生而純篤力學不倦康熙丙子舉人知
河南新鄉縣奉法愛民清約自甘俸外無纖毫
染報最督臣荐以老成持重明敏練達特旨召
見 天心喜悅賜貂皮數珠等物遷陝州牧未
三月擢守萊州時登州有以千金暮謁者幕友
欲發其事榮賜瞿然曰止期吾心無愧何得以
人身家沽一己清名乎以原金卻之入稱長者
內轉部郎未及任旋里囊橐蕭然惟餘圖書數
種而已

何允紳

賦性忠誠持身恭儉見事明敏接物謙和由雍
正壬子舉人知江南虹縣虹居淮黃二水間勢

甚窪下到任之日天雨淫霖地多積水禾苗沈沒者多瞿然曰如此虹民其何以堪因檢縣志見北有黃泥溝中有汴河南有龍宿等溝皆前代及國朝所開以洩水者年遠湮塞僅存其形因親身跋涉延訪舊制為之請口糧督民夫以疏通之是夏水不為災麥大稔禾稻菽豆亦有秋九月河決自北而南縣適當其衝平地水高丈餘城不沒者三板登城瞭望紮筏濟民於洪波巨浪之中遷置於屏龍二山上捐給饘餅以食之民得不死又具文請賑復為之籌籽種勤勸課後遂屢豐積勞瘡發卒於官

王榮勤

生而聰穎端厚不佻十歲出就外傳受書已了大義及長博綜經史並措意經世之務援筆為文議論宏遠十六入泮十七食餼十九登雍正乙卯賢書直督高公晉聞其名延之課其孫樸教有成法卒為巨儒乾隆丙寅興修水利高公保奏留工効力補霸州淀河州同夙於古名臣治河諸書詳考有得又精於工程算法巡閱所及必分晰繪圖貼說俾觀者瞭如指掌經營規

度不失尺寸是以辦理悉協陞子牙河通判極為制府方公觀承所器重乙酉陞石景山同知渾河水勢無常疊被冲激歲費帑金無算永定河道知其才鉅細悉倚之遇汛晝夜防護俾數郡無洶湧之患暇則遐稽水經參以近勢溯源流著有永定河志調北岸同知詳慎經理工程要款實用實銷癸己聖駕巡河御賜忱哉樹匾額並御製詩章兼賜貂皮緞疋直督周公元理保荐丙申出守處州地處萬山民貧土瘠俗尚朴陋榮勤振文風變澆俗興水利建學宮未及二年政通人和丁酉卒於官

梁彬

清標孫四歲而孤明敏宿成日記千言博極羣書工詩古文詞以廕生授刑部員外晉郎中奉差坐糧廳放山東濟南知府釁調甘肅涼州蘭州二郡服官以利物為先五原歲歉以工代賑不敷自為捐俸以施菜粥至質簪珥衣裘以繼之活民無算而義之所發不徒飾寬柔之容以貌為長厚守濟時而折秉臬者以不職左遷而彬談笑不少措意既而秉臬者以不職左遷而彬

之直風愈著丁艱服闋因公降調授西甯令軍
興旁午而躬方嬰疾委辦牛羊各萬駝千隻兼
備糧儲刻日赴軍舉座為之失色彬慨然曰此
正臣子效忠日也力疾視事不五日而諸務畢
舉陞固原知州授浙江紹興知府以疾未赴養
痾里中垂二十年閉閣讀書不預外事資用屢
空意宴如著有無
染碑紀以壽終

何夢蓮

七歲能文長遊庠序試輒冠軍乾隆丁酉拔貢
廷試一等授刑部七品官己亥領鄉薦悉心談
律析疑辨難無間寒暑司寇胡雲坡特賞識之
接丁父母繼祖母憂濡滯數年服闋赴部游歷
至事員外郎中凡纂修律例綜持秋讞事之艱
鉅堂官委任不疑屢膺保薦嘉慶元年楚苗不
靖奉旨馳赴軍營權衡永彬桂道僅數月實
心釐剔奸弊畢秋帆制軍有大才不可小用語
因母年高軍務甫竣即就京職歸田侍養閱十
年終喪起補戶部郎中轉山東道御史條陳時
政論長蘆鹽加價不為商利止以病民疏入得
減去每餉錢一文出知陝西榆林府敦耕勸稼

梁濟生

講求水利榆林沙漠歲多風旱夢蓮禱雨輒應
屢致豐稔民之頌德勝於湘南矣屏絕苞苴處
約守儉亦清况等於部曹董觀橋中丞稱心
地聲望而知為正人君子因公鑄級歸
字文川天資英敏讀書就外傳過目成誦年甫
弱冠學業已成應童試三冠軍乾隆庚辰春補
諸生是秋即領鄉荐兩赴禮闈皆報罷時父彬
以紹興守引疾歸田春秋漸高家况漸落為養
親計丙戌大挑分發湖南歷署華容醴陵縣事
旋補安福調長沙首邑前後十餘年才猷茂著
乙未丁外艱回籍服闋揀發湖北歷署興國牧
江夏令補穀城未之在仍署江夏所至皆著循
聲公餘操筆為文間為韻語皆足為藝林法江
夏任內緝獲隣境巨寇且獲盜首大府正擬保
題以疾終於
江夏官舍

梁蘭生

字韻亭才識過人髫齡就傅屬對警絕塾師驚
嘆卜為遠到器父彬牧固原延浙紹江公督課
甚嚴年未弱冠舉業已成隨侍宦游至戊子始
入泮庚寅即補廩生三人鄉闈俱荐不售親老

須祿養援例捐府經歷分發江蘇未補缺丁內
 艱回籍服闋仍回原省補松江經歷奉委解福
 建兵米航海入閩備歷艱難甫三月差竣旋蘇
 撫閱公大異之乙酉膺卓薦委署金山南匯知
 縣調署華亭皆有政聲庚戌奏補江陰片言折
 獄政聲洋溢辛亥調句容地當孔道吏滑民刁
 最稱難治蘭生剔弊燭姦刁滑斂迹有訟師最
 著者某某廉核得實按律詳辦民害頓除甲寅
 調長洲地當省會又為三縣首賦重政繁刻不
 容緩而清釐積案平情察理不以刑求性愛士
 凡邑中以文就謁者無不敬而禮之而童子試
 尤矢慎有蔣生名景福者貧而才一見異之拔
 置前茅既入泮復召入署中飲食教誨培植尤
 厚其他振拔單寒多類此辛酉七月相驗得疾
 旋署卒

王發枝

字南玉才藻敏瞻每操觚洒洒千餘言倚馬可
 待十三入泮二十四中雍正甲辰舉人出宰廣
 東昌化兩校粵闈所拔皆知名士吏才天授刑
 名錢穀綜核精詳為治以德不以刑慈祥明敏

邑人稱神君焉年四十卽謝病歸天性孝友事
 父母養生送死獨肩厥任析產讓諸弟先聞分
 仍以所得產佐北堂養老之資持躬謹飭二十
 年林下無纖毫事干謁公門接物以謙與遊者
 心曠神怡如飲醕醴歿之日擔夫販婦聞之莫
 不歎息蓋所重者德行文藝又不足言矣善言
 語每於親故稠人中出片語必令人絕倒或有
 紛難眾莫能解者每以一言釋之其盛德之感
 人如

梁穆

字改亭清標孫與兄雍同生幼失怙恃而穎悟
 絕倫文筆輕超尤工書法由康熙乙丑選拔任
 江西袁州府同知守法奉公潔清自好陞廣西
 平樂府知府赴部引見奉特旨調江南蘇州
 府知府蘇為首郡政務殷繁矢公

梁鈺

字晴川穆孫弱不好弄嗜學精且專總角補諸
 生試輒高等與酒大令清柱王封翁築岩齊名
 為文清刻透露駸駸入先輩大家之室屢赴鄉
 闈年三十餘猶未第因以廩貢援例候銓州牧

試用江南借補望江縣尋授壽州牧州為古壽
 春地人悍勁睡毗小怨輒相殺鉦盡心撫字出
 以鎮靜風俗為之一變而頑梗者寬以猛濟之
 立緝捕科條重懸賞格遂獲隣境巨盜俗所稱
 王六者也督撫疏其功特恩以知府擢用得某
 缺而同引見諸公有得嘉興者 上以嘉興授
 鉦而原擬之嘉守改調某缺蓋異數云守嘉興
 數以仇直拂制軍意因公鑄贖捐復授浙江衢
 州知府丁艱起復授建甯府知府護延建邵道
 篆調甯波府知府屢守名郡不援上不倍下公
 勤廉潔政聲蔚然陞甯紹臺道四明據海關津
 要洋船往來百貨駢集物侈而豐雖處脂膏未
 嘗自潤每遇令節堂廡蕭然性愛文墨公餘之
 暇屬吏紳士以詩文請政者循循善誘如寒素
 交卒於官

梁用梅

字霽亭鉦子生而聰穎弱冠補諸生乾隆乙酉
 舉人大挑知縣在甘肅文縣山東范縣均占
 桑緝捕盜賊每遇偏災立陳上聞神功占
 公餘退食以文章詩賦造就士林

酒養澤

字潤甫生有殊姿穎悟絕人垂髫補諸生旋食
 廩餼文名日噪每試輒冠軍康熙丁酉舉於鄉
 雍正丁未選甘肅合水縣知縣旋署甯州牧又
 攝環縣事卓鹽課禁私派除苛征抑豪民戢衙
 蠹善政多端辦理軍需夙夜匪懈王事靡盬之
 念終如始焉致仕歸孝友性成待諸兄之子情
 誼懇摯周其匱乏婚娶竭力襄助不少吝六十六歲以壽終

關衡鑑公明所得多知名士德州盧南石相國
 尤所賞識者也陞濮州知州卒於官著有香草
 齋詩集

衛尉函三公傳

梁清遠

公諱慈字衆甫號函三先冢宰公第三子也幼負奇質有幹略爲博士弟子大河以北無不知有衆甫者顧數就順天試不第歲壬午試官賞其文欲置第一乃以語多宏肆不果遂以例陞上舍諸上舍推頌不敢與公齒已就試銓曹又冠銓曹諸試者然公未嘗自矜也愈讀古人書不輟無何先冢宰以武功廕予執金吾長公襲未久無祿公適當嗣於是遂爲執金吾夫執金吾多以摘發訶刺爲事公固未嘗以振發訶刺爲事也朝章國典素所諳習且舊受業於忠毅

公之門忠毅所交之賢士大夫無不與公交者杯酒
讌洽誦說古今忠義娓娓不倦楊忠烈公漣高忠忠
憲公攀龍都御史左公光斗太史繆公昌期與公交
更深是時神宗皇帝嘗下諸臣於獄歷年不釋公從
獄中多保護之滿尚璽朝薦以慙直得罪中涓禁繫
且久公上疏切諫以爲不宜上怒禍且叵測以相臣
申救乃已哲宗卽位晉公掌詔獄公鞠訊得情無縱
無枉時有中涓盜內庫詔公質訊中涓夜饋公數干
金公立卻之曰四知之說某習聞之矣敢因以爲利
哉熹宗立公正位中尉勅提騎毋生事毋害人違者

繩之以法不貸時李選侍覲垂簾楊忠烈公及諸大
臣力抑之熹宗御殿選侍在簾內楊忠烈公曰簾不
撤諸臣不敢拜願語公曰平日所語忠義何爲公命
諸校尉撤簾簾撤而選侍退避人遂以此服公知大
體能處變歲癸亥福清葉公爲相知公忠正欲大用
公公上疏辭職葉持中旨不下公再四請乃得放歸
歸而足跡不入城市葺郊外不蕪園以居日與鄉人
話桑麻較晴雨臺使者求一面不可得然好賙人之
急恤人之患人有急患皆就公求解公悉心籌畫務
令釋然乃已公書法宗顏柳所至好書壁燕趙間名

刹道院無不有公書晚好種樹數年間種樹萬餘株
嘗自署曰樹隱卒年七十八

梁子曰嗚呼世有如吾函三公者非英英烈烈者歟
難進易退士之義也仕宦之途沈溺於中者不少公
方陟雄職遽爾投簪汲引有人亦不暇計至黨綱禍
起諸賢死者死戍者戍株連被禍袂相屬公脫然事
外其幾何神哉初公爲執金吾趙忠毅公寓書足下
得執金吾固奇未若執金吾得足下之奇也忠毅公
固不輕許可觀此公之生平蓋可觀矣

酌梁慎可墨香亭留別

鄭之文

深杯竟夕弄林臯回首花間聽百勞松菊猶存吾事
濟雲霄立上子名高潛鱗未信還吹浪籠鳥從知己
解絲他日墨香亭上墨相思不惜寄揮毫

送大叔父備兵德州

梁清標

賜履東方擁傳行青門猶子悵前旌外臺憲節新開
府郎署風流舊水衡按部平原春雨細舉帷梁父暮
雲生喜看鎖鑰瞻天近卿月高懸接鳳城
日邊方岳自崔嵬分臬羣推叔父才去慰倚門慈母
望遙傳執斧使君來大官玉粒千艘集諸將戈船萬
隊迴重地卽今須保障安瀾東顧海如杯

送承篤姪令錢塘用汪蛟門韻

書生初作吏飛鳥古錢塘絲管江城麗湖山歲月長
秋風紛桂子細雨急蠶桑汝去平田賦無令穡事荒
聞說湖邊柳陰陰覆舊隄波晴猶草色山曉但鶉啼
機杼官坊錦芙蓉越女溪東南民力盡歷覽漫留題
子好佳山水茲行夙志酬千門開畫裏萬弩射湖頭
訟少垂簾治農忙露冕游何時能拂袂同泛武林舟
武穎凡令永和書來卻寄
霜後離羣朔氣催故人迢遞一書來白頭尙列郎官
宿彩筆徒憐傲吏才金甌有塵航畫寂山城如斗見

花開奚囊投我多新詠坐覺清風入早梅

送何誕登司李瓊州

萬里匡山送子行張燈樽酒憶平生十年交誼同蘭
臭此夜悲歌變羽聲嶺嶠瘴烟連海氣枕椰暑雨滯
江程來朝匹馬春風遠撥罷琵琶淚滿纓

送誕登叅藩入蜀

蠶叢鎖鑰借黃門落日驢歌斷客魂萬里青天開益
部十年組甲定公孫錦屏風雨登臨壯棧閣雲霄攬
轡尊去近草元楊子宅郵筒寄字共誰論

送張晦先遭繼母大夫人憂旋里前按粵會撫

巨寇

七尺身留萬死餘麻衣又見返荒廬威行海國消鯨
浪孝感慈幃躍鯉魚送客兩行燕市淚歸裝數卷嶺
南書篝燈猶記論文日君去誰能更起予

送張晦先僉憲之松龍

圖書數卷去邊州萬里蠶叢亦壯游隴樹影迷雲棧
曉夜猿聲斷錦江秋羌人歌舞思廉史荒塞烽烟借
勝籌惆悵一樽燕嶠暮送君風雨罷登樓

郎署頻年領外臺清風共識使君來南巡炎海鯨波
偃西望青天鳥道開綏帶不妨耽嘯詠枕戈親爲關

蒿萊遐方莫嘆功名薄節鉞須煩管樂才

送張晦先少叅之滇中

琴鶴携來蜀道賒征車南逐彩雲斜三秋露落初收
瘴六詔烽消早放衙異域功名歸博望殊方人物志
張華莫言萬里風烟隔一沱昆明似漢家

張晦先學使入覲過齋中夜語

嚴程萬里入朝 天白髮相看絳燭前絕微論文飛
瘴雨春霄對酒話風烟蕭條宦橐長如客迢遞游踪
不記年太史原多山水助知君五嶽著新篇
遠道停雲客思深殘更對榻夜沈沈蠻方行部惟孤

鶴荒署篝燈但苦吟蒿目欷歔天下計論交淡泊古
人心有才如子塵中老白雪彌高幾和音

送張晦先重往黔中

薊門風雪聽歌驪惆悵楊花送馬蹄乍過鄉關仍驛
路喜看文教被雕題鷓鴣聲裏荒烟合鴻鴈洲邊落
照低回首故山頻北望浮雲淡漠 帝城西

紅亭吹笛曉猶寒芳草青青倦眼看十載逡巡人老
大一官去就事艱難離尊更進心方折猺洞重經路
幾盤倘過荊州王粲宅登樓有句寄長安

寄張晦先

梁清遠

青陽布芳景驅車來京國對策獻 明廷遂通金閨
籍維余有良友同升秉書嘉德余也官典獄行殊履荆
棘君也返故園高文自被飾瑤篇遙見示奕奕有古
色大觀達物情微言增神識倏忽阻寒冬念子情何
極短章託歸鴻爲道長相憶

送姪孫穆之任姑蘇太守

梁清遠

憶昔歲辛未君來自京洛余時賦采芹年少復孱弱
惟君重骨肉相視良不薄有子非凡鳥謬以余秉鐸
外雖擁絳帳內乃藉攻錯槐市步後塵仰止鞭先著
迨乎午未間振袂辭林壑出爲郡司馬吏隱恣磅礴

袁陽十二載吟詠耽蕭索功懋懋厥官晉階守平樂
天子重大郡特簡破成格溫論念老臣清問及花
萼三吳號繁劇政聲好圖度世人競紛華君能尙簡
約世人矜權勢君方厭燠灼紛紛才且能徒誇金羈
絡詎知仕路難難此求民瘼行行及仲春熊軾驅維
駱古人于東海作郡絕屬託澹與泊相遭風規何落
落加餐須努力有酒亦斟酌古人固有時所願登黃
閣送君沱水濱慙慙晉康爵青青路旁柳矯矯雲中
鶴高足自難量天衢任騰躍升沈隔雲泥相思手欲
握

贈梁洽湄明府

正定人

錢塘邑宰

時鄰封告警萬

馬千軍齊集境上正供應不遑之日公處之裕
如猶拉子酣飲湖上出其所著柳村詞及藤塢
近詩屬予選訂其才與度量之超越可概見已
然以此告人多有莫之信者

李漁

錯節盤根到此時便教利器也難支羨君不費絲毫
力傳檄能安百萬師猶有餘閒招過客更饒佳興賦
新詞歸傳此事誰能信盡說諛言媚所私

正定縣志卷二十九

文學

南人之學清通簡要北人之學兼綜條貫莫不和聲
鳴盛黼黻文明正定風俗敦龐士習質厚名賢前輩
或以經學著或以文章顯或以詩字傳摛藻揚芳無
愧作者

國朝重熙累洽丕振文風軼羣絕倫者榮登科等令聞
廣譽文以人傳而湮沒沈淪不得志於時者亦所在
多有不廣爲搜葺一生著述燼滅烟銷豈不重可惜
哉但世家大族尙有譜牒可徵故采摘較廣其餘則

無從考核矣編葺之下不勝憮然

漢

王

禹常山人成帝時為謁者世受河間樂能說其義弟子宋粵等上書言之班固藝文志樂義有王禹二十四篇

南北朝魏

房

虬善周官儀禮授南皮李寶鼎

隋

房暉遠

幼有志行恆以教授為務遠方負笈而從者動以千計周武帝平齊搜訪儒俊受小學下士高祖受禪遷太常博士太常卿牛宏每稱為五經庫吏部尚書章世康薦之為太學博士尋為沛公鄭譯修正樂章丁母憂解任後數歲擢國子博士會上帝命國子生通一經者并悉薦舉將擢

用之既策問訖博士不能時定臧否祭酒元善令暉遠考定之暉遠攬筆便下初無疑滯或有不服者暉遠問其所傳義疏輒為始末誦之然後出其所短自是無敢飾非者所試四文數日便決尋奉詔預修令式高祖常謂羣臣曰自古天下有女樂乎楊素以下莫知所出遂言無女樂暉遠進曰臣聞窈窕淑女鐘鼓樂之即王者房中之樂著於雅頌不得言無高祖大悅仁壽中卒於官

宋

劉

絢

字質夫以蔭為壽安王簿遷長子令督公家逋賦不假鞭扑而集歲大旱府遣吏視傷所蠲財什二絢力爭不得封還其揭請易之富弼嘆曰真縣令也元祐初韓維薦其經明行修為京兆府教授王巖叟朱光庭又薦為太學博士卒於官絢力學不倦最明春秋程顥每言他人之學敏則有矣未易保也若絢者吾無疑焉

金

蔡松年

字伯堅父靖宋宣和末守燕山松年從父來管
勾機宜文字宗望軍至白河郭藥師敗靖以燕
山府降宗望辟松年為令史天會中鎮定初平
盜未靖山中居民脅於賊者千餘家松年力為
辨論竟得不坐置行臺尚書省於汴松年為行
臺刑部郎中都元帥宗弼領行臺事伐宋松年
兼總軍中六部事宋稱臣師還宗弼入為左丞
相薦為刑部員外郎皇統七年尚書省令史許
霖告田穀黨事松年素與穀不相能是時宗弼
當國穀性剛正好評論人物其黨多君子韓企
先為相愛重之而松年許霖曹望之欲與穀相
結穀拒之由是構怨故松年許霖構成穀等罪
狀勸宗弼誅之君子之黨熄焉是歲松年遷左
司員外郎松年前在宗弼軍而海陵以宗室子
亦在宗弼軍中任使用是相厚善天德初摧吏
部侍郎俄遷戶部尚書海陵遷中都徙摧貨物
以實都城復鈔引法皆自松年啟之久之進右
丞相加儀同三司封衛國公正隆四年卒年五

蔡珪

十三海陵悼惜之奠於其第命作祭文以見意
加封吳國公諡文簡松年事繼母以孝聞喜周
恤親黨性復豪侈不計家之有無文詞清麗尤
工樂府與吳激齊名時號吳蔡體有集行於世
松年子正隆中登進士第不求調久之乃除登
州軍事判官遷三河至簿丁父憂起復翰林修
撰同知制誥在職八年改戶部員外郎兼太常
丞珪號辨博凡朝廷制度損益珪為編類檢討
刪定官尋遷禮部郎中封正定縣男得風疾致
仕所著有補正水經五篇合沈約蕭子顯魏收
宋齊北魏志作南北史三十卷續金石遺文十
卷晉陽志十二卷文集五十五卷

元

瞻思

字得之生九歲日讀古經傳至千言見諸踐履
多篤實之學延祐初以科第取士有勸其就試
者思笑而不應既而侍御使郭思貞翰林學士
劉睿參知政事王士熙交章薦之泰定三年以
遺逸徵至上都見帝於龍虎臺眷遇優渥時倒
刺沙柄政思獨不往見倒刺沙屢使人招致之

卽以養親辭歸天歷三年召入爲應奉翰林文字進所著帝王心法文宗稱善詔預修經世大典以論議不合堅以母老辭遂賜幣遣之至元二年拜陝西行臺監察御史卽上封事十二條曰法祖宗攬權綱敦宗室禮勲舊惜名器開言路復科舉罷冗軍一刑章寬禁網皆一時羣臣所不敢言者及分巡雲南按省臣之不法者其人卽解印尋除僉制西肅政廉訪司事以制右諸僧寺有所謂道人道民行童者類皆賣倫常隱徭役使民力日耗乃建議使勒歸本族俾供王賦以少寬民力朝廷是之著爲令四年以病歸後召爲秘書少監皆辭不赴卒諡文孝所著有四書闕疑五經思問正大諸臣列傳審聽要訣及文集三十卷藏於家

陳思謙

字景讓警敏好學至順初拜監察御史建明八事曰正君道結人心崇禮讓正綱紀審銓衡勵孝行紓民力修軍政言皆剴摯通達國體屢遷御史中丞卒追封魯國公諡通敏思謙於凡名物度數綱紀本末考訂詳究深於邵子皇極經世書

王元甫

至元末爲宣城簿監有政要詩集

郭士文

善屬文至正中爲禮儀院祝

楊俊民

第進士爲翰林編修歷山西廉訪僉事入爲禮部郎中陞國子監司業遷集賢直學士至正中奉命祭曲阜宣聖廟并葺祠宇還拜國子祭酒文學政事著聞於時有滹川文集

明

梁橋

以貢選入太學從翰林學士吳惠講性理之學授四川布政司經歷負性不能下人每從吟咏間刺時事有名山多虎詩借問循良何處是人皆貧死虎縱橫眉州多雨詩憑誰爲挽干尋帚一掃浮雲仰日還見者惡之告歸茹素安貧平生嗜古好學凡諸子百家佛經道書人相地理稗家小說數學醫術無不通貫喜談詩

梁釗

以明經貢於廷成化中授杞縣訓導性資溫厚學問淵深諸弟子有不足者出俸分給之尤邃

張瑀

於性命之學教人先躬行而後文章言動進退不失尺寸諸生有越度者委曲開導卽爲改行諸生多讀書能文以數奇寓意聲歌每卽席度曲未脫口燕趙間已遍賭於旗亭梁侍郎清遠摘其還金記紅雨青莎之句比之馬東籬王實甫云

王蔭

父宣教授晉藩蔭隨讀焉性甘淡泊篤嗜經史中年食餼踰六十始登歲薦不願仕閉戶闡明性理教訓子孫暇則

安策

諸生少負異質好讀秦漢以上書學使左光斗以國士待之數奇屢試不中第晚益究心經學以教授生徒終其身梁侍郎清遠比之匡稚珪公孫宏蓋通經博古之士云

許國鼎

天啟辛酉舉人性孝友深遠有識不事家人居業喜積書博學工詩文訓誨子弟有方伯母劉氏無嗣善視之沒殯葬以厚生平吟惜名行樂平坦易鄉人感其盛德

梁思

生而敏慧詩書過目成誦父夢龍延名師教之文益嶮峭多驚人語洋洋洒洒成大議論及寡

梁志

寥數語亦有深味卓識字學顏柳筆筆蒼老未及壯而卒

性質敏慧眉目如畫試諸生高等攄詞發藻迥出流輩一意博覽自墳典邱索以及百家雜言無所不窺好法書名畫古彝佳玩宅後構小園高木修篁蔚然深秀臺閣池館不事藻繪曲折盡致從西山搜奇石數種森列園中日拭葉几置圖史器物葛巾羽笠吟咏自娛或邀朋友杯酒話舊與與如也雖未服官頗饒經濟才每與人談時事慷慨切切如謂養兵宜精不宜多人宜鄉舉里選不宜專憑文藝理財宜省無用之費不宜苛責通賦冗員宜汰不宜增孝秀宜擇有才行者實實教導不宜作養名濫收匪類識議宏卓有如此者甲午國遭禍亂家變隨之遂以三月二

十四日卒

劉駿譽

廩生資性穎異過目成誦六歲能詩十三爲文多奇句十七文愈奇汝南傅公爲學使深加嘆賞拔冠諸生爲文頃刻數千言曲折盡變詩一卷名婁婉語年甫弱冠歿

王兆泰

布政使藻之子庠生天資英敏於書無所不讀經史而外考及百家凡奇門兵法天文術數之學無不殫精研思窮其奧妙每遇異書必購求手錄吟哦不輟生雖貴介而持躬方正不屑名利都司賈公仲勤曾為文述其生平刻之墓碑當明末與族輩登郡城東北方忽有紫氣燭天驚嘆曰國運將終有大變此天意也公歿三年崇正升遐始知公有先見云

梁維麗

生而願偉丰姿修潔讀書入目輒不忘下筆娓娓千言立就弱冠補諸生不得志於場屋遂棄舉業以古人豪俠自許寄情詩酒力工書法廣交游重然諾遇人之急力為排解而睚眦之辱不受亢爽質直益鍾燕趙山川之氣而善傳朱郭之遺風者也

梁清宓

生而聰穎及長偉軀山立眉目竦秀補諸生攻苦為文章從弟清英少負奇稟天才高邁為文奇宕自喜好放言高論願與清宓相善時過從笑談驩甚數以文章事功相砥礪時流寇披猖疆事大壞語及時事輒投袂思奮為國家當一面挽強命中馳騁平沙廣陌問互再勝其

梁士澹

笑樂左顧右盼意氣湧出矧自得也崇正己卯舉於鄉平昔為文簡質一變為閎深鉅麗之文夙有血疾壬午復發與清英同嬰是疾癸未增劇無何卒清英壬午中副車亦以是冬卒幼負奇稟天姿偉異年二十補諸生為文鴻雅試輒高等漁獵載籍強記不忘有所著作正言鴻論有關世道人心不妄交游過意氣投合者即無欺無隱披肝胆以相示教子盡義方之訓少有逾於禮法即面斥改正惟恐獲罪聖賢遇人有急難不平事力為救濟昭雪雖遇豪強無所避焉崇正壬午舉於鄉國變後遂閉閣謝客誦讀以終

本朝

邊聲遠

字駿也順治乙酉副榜長身玉立其言藹如其貌温如發為文章豐偉華瞻有臺閣氣象與張之俊施肇元張純熙梁清遠等七人結桐引文社久而不倦之俊等俱成進士聲遠伏處荒村披吟不絕卓然自立不與人接教學相長輿誦嘖嘖中年舉於鄉科第雖遜於諸人而能為有用

之學羣推之
為祭酒云

何仙桂

歲貢香河訓導持家勤儉教子成名舉業尤純

何嘉模

歲貢處世練達學精周易

韓續祖

字繩武幼而聰慧好為古文詞長而温然栗然

世目為璧人日鍵戶讀書取古人嘉言懿訓迴

環玩味必得其意之所存而後已不徒汎汎以

郝濬

博學能文尤工書法康熙丙子解元丙戌進士

梁清适

字倪庵幼穎悟異凡兒年十五入泮二十一歲

登拔萃科是為康熙丁丑文章淵雅詩亦清新

尤長古體游歷姑蘇長沙諸處氣魄得江山之

助所造愈工數奇不偶至辛卯始中副車晚年

何瑞

康縣癸未進士勤苦力學淹貫經史知華亭縣

韓令楷

恬退自適著有聿修錄十卷

王發善

知府榮恩子幼而失怙世業中落篤志力學工

於制舉之文為人温文靜穆饒有儒者氣象醉

後則高談雄辨不得以方幅拘之康熙壬寅拔

吳元默

貢雍正癸卯舉人知四川榮經縣調中江皆以

何杓

文學飾吏治卒於官廩生文章推重一邑字學自成一家

王球

幼倜儻豪邁好鬪鷄走狗及劍戟之屬年十八

遂屏棄一切潛心詩書一試輒冠軍補諸生遂

食廩餼屢試居第一梁相國清標見其文曰翰

院才也康熙丁丑李安溪相國視學畿輔拔入

成均辛卯中式出武進趙恭毅之門精於制藝理

王 珣

字和璞生而穎敏姿貌清癯幼習舉子業出語不羣間為小詩如古澗幽泉風林秋籥年十六入泮次年父官石球為賊所劫被鹿所匿僅而獲免傷家僕二竊篆以去緣是罷官珣聞耗跋涉數千里省親皖城在南四稔入謀餽粥視色笑出糾官司營借貸貧窮之狀風波之險訟獄之勞人情之險無不畢經卒獲昭雪狼狽歸來毀庭事以償債主不勝抑鬱而卒未半載妻梁氏亦卒無子

王 瓚

字潔齋童時即工書法讀書通大義重厚簡默迥異恆流十五應童子試卷為同邑子竊去易其面學使蔣虎臣先生廉知之令默誦其文歷如貫珠竊卷者不能也遂大蒙獎厲拔入邑庠親族咸稱其胆識孝友性成兄珣早亡無後為立傳以傳之中年歷諸省客館孤窗每作小詩自遣類皆懷母思弟之作晚年家居簞瓢自甘恬如也接人誠信有禮不作市道之交有過直言不諱未嘗口是心非門內竟而有法雖臧獲之賤未嘗以惡語相加常曰彼亦人子也可多

求焉惟師姑巫婆不許入門故內睦外肅稱良族云

王 鍾岳

增生兆泰子狀貌魁梧美鬚髯善騎射工書畫詩詞歌賦無不各臻其妙游京師名噪一時捷徑取功名甚易以非科甲正途概辭不就卒困場屋以諸生終著有香草亭詩稿

王 原讓

增生鍾岳子性情拘謹惟以讀書為樂現田自給意泊如也後子榮勳貴迎養處州紫雲親磨依然寒素生平肆力翰墨臨摹古帖幾於等身書法直逼二王畫亦雄厚時入米家之室著有退菴詩草

何 瀚

庠生詩宗李杜字法鍾王處家祇父恭兄待人扶危濟困庠生淹通今古書法尤工文章磊落不羣家庭謹慎有禮

何 天枚

原讓弟增生才思敏捷作文未嘗起草伸筆直書意興勃然頃刻而就經學精熟每課讀教法甚嚴故後學之士多顯名者

王榮武 字繩其歲貢生丰姿秀整體幹偉然制藝温醇警策雅俗共賞每列前茅詩亦清逸有意趣九十一歲始終

王良翰 字公藩隸子雍正己酉舉人經書精熟文王於理不尚浮詞視幼學有雋才者誨之不倦持家清儉不為濫交禮亦不屑借問於人其介節有可稱者

王麟超 號厚庵隸子生而秀整舉止軼羣書習趙董兼效本朝方邵村畫仿倪迂詩古文詞天然雋秀雍正己酉拔貢 朝考一等第六名試用江南初授句容縣丞丁內艱服滿補福泉縣丞調婁縣縣丞歷署金山上海甘泉長洲震澤婁縣興化知縣勤於職事前後薄宦二十年上官無不刮目署甘泉時巡撫陳公大受謂之曰此隄擅之地吾知子之操守可往理之震澤缺出巡撫安公寓日舍王某無可任者其見重上游如此屢蒙推荐輒因上臺更換而中輟故備經險阻終於佐邑人皆以為憾而和平恬靜進退綽然年八十一歲卒於家

何 珮 歲貢生候選訓導嚴明正大好讀異書制藝以成宏為宗受知於吳荆山學使居家勤於教誨族中有志上達者極力獎勵文社數十年不絕

何元續 庠生襟懷洒落姿性清高雅好琴書寄情邱壑

王榮爵 庠生貧而好學嘗灌園置書其旁吟詠不輟風度端凝為文有奇氣享年不永無疾而終

王榮文 庠生文思英銳赴童子試赫然有聲縣府院三試皆冠軍亦有志士也卒以天死可惜也

梁朝鼎 號西屏清適子雍正乙卯拔貢任山東荷澤縣丞歷署荷澤曹縣范縣知縣保民若子賢聲茂著文詞宏深詩歌雋雅書宗顏

柳兼工繪事著有西村吟草

何元紹 乾隆丁卯舉人器宇軒昂襟懷濶大學兼班范文類熊劉

王發甲 廩生性質軼羣善戲謔嗜酒不修邊幅書法仿東坡詩古文詞隨意揮洒皆有磊落英多之概

安州陳蓮窗先生司訓正定深加器重以為北方不羈之士惜享年不永

王發端

良翰子乾隆癸酉舉人性敏勤學精於理解作文有盛氣授徒各方成名者甚眾

王發傳

字築岩麟起子家貧幼與長姊手引碾治粟暇間挾書一卷且張日誦又長乘夜出屋後掘野菜拾薪茶讀書聲琅琅達夜半未息十五入邑庠己而從父任於江南閉口不與公事或以為訝謝之曰父兄居官而子弟席勢干庶政非佳事既歸里乃萃子弟於家塾躬親督之誘掖肫懇每講授反覆纍萬言聞者豁然心為之開所成就者指不勝屈乾隆癸酉拔貢戊子舉於鄉十郡之士翕然悅服為文一本先民手錄經史子集盈車所評定經傳及制舉文百餘種自著詩文集及廓亭日錄十數卷又遍走數里訪族人散處者為家傳十卷並藏於家性勤儉無浮費惟周急是務有媿適富室而後貧者又有舅沒而妻子匱乏窮瘁歲時調餽未嘗少衰長妹適梁而發家徒壁立立經紀其家為置薄產擇族子繼以為嗣以孝謹稱其篤於親族類如此晚年闢路北一廛蒔卉藝蔬名曰頤園召子弟及門弟子游觀其間論文課藝忻然忘倦壽七十

五歲以

疾終

何雲藻

乾隆乙酉舉人豁達伉爽胆量過人有識善斷見義必為文章自闢町畦開後人之門路子夢蓮等能以文學世其家

王發信

字田叔歲貢生少逸游不耐誦讀而姿性明敏一覽即解宗師錢香村按臨正郡拔取入學且以領案謂之日汝文頗似方百川豈寢食其中者已久乎然發信實未嘗讀方文因兄發傳令其日抄方文一篇未幾因考期逼近置之及入場純用其氣機視他人常習方稿者遠勝多多也隨父任未博一第

王發桂

字香岩幼而嚴重不事佻薄讀書勤苦作文好為驚人語乾隆辛酉拔貢江南海州州判性儉素惜物力妻潘氏以富室女亦復勤於家政不事奢華文望政聲藉藉人口

王發頰

增生性醅厚甘淡泊樂逸閒尚清玩書學趙子昂兼工繪事

王發頤

廩生丰姿疎秀穎悟過人詩文典麗風華紛如
錯繡少應童試縣府院俱第一卒年三十三
增生有雋才為文清逸饒有別韻亦能書惜年
不永

王正準

字景萊發傅子幼承家學博極羣書尤善陶造
後進乾隆乙酉拔貢戊子中副車與父發傅同
榜時人榮之充正藍旗教習
官饒陽教諭父沒以毀卒
官古田縣丞著有夢溪詩鈔

王榮增

發桂子字霽亭浙江杭州府經歷陞定海知縣
擧獲洋盜送部引見奉旨以知州用著有
霽亭詩草

王正悅

發信子歲貢生自奉簡約而調人之急往往傾
囊無吝色且友於情篤己無私財昆季之間融
融如也喜臨池書法直抉二王之奧十赴秋闈
不第晚年司訓盧龍非初志也著有碧桐山房
詩稿

王正渠

發信子歲貢生自奉簡約而調人之急往往傾
囊無吝色且友於情篤己無私財昆季之間融
融如也喜臨池書法直抉二王之奧十赴秋闈
不第晚年司訓盧龍非初志也著有碧桐山房
詩稿

何延廩

乾隆丁酉拔貢癸卯副榜福建海澄縣丞生而
聰慧性情溫和詩文歌詞皆有清新俊逸之致
工諧笑美丰儀雅度翩翩
見者僉目為神仙中人

何彤

乾隆己亥副榜候選縣丞裕後有方好古不倦
儀容偉岸福壽兼全
歲貢生學問淵深文章闕博學使德文莊公拔
為闈屬第一以品端學粹旌其門任武邑訓導
兼通醫理五經醫書皆
手自抄錄卒年九十餘

張號曾

歲貢生學問淵深文章闕博學使德文莊公拔
為闈屬第一以品端學粹旌其門任武邑訓導
兼通醫理五經醫書皆
手自抄錄卒年九十餘

劉學博

聰穎過人六歲受書過目成誦十三能詩且多
驚人句織錦迴文他人多不解一覽即能分辨
知府鄭公大進大加賞識拔冠童子軍次年又
為督學所賞識拔冠一軍補廩年甫弱冠也然
數奇不偶至乾隆庚子始登賢書任趙州學正
同官敬禮紳士咸宗仰之甫三年卒於官教讀
之暇研求方書用以小試無
不奏效四方祈請者不絕

何夢璋

雲藻子廩貢生性和平工書法筆力峻潔遠近
求者踵相接及老猶力疾學書可以識其勤矣

何蒲

廩生

生而穎異弱冠能文尤工書法賦性端重

王發燦

字柳庭

榮勳子學問醇正尤長於詩乾隆甲寅舉人令山西文水居官清慎沒後一貧如洗著有棟者

堂詩草

王發楠

榮勳子字楚良嗜古好學手不釋卷乾隆己酉拔貢司訓永清被其教者皆能自立族人知縣

世耀永清雲貴制軍劉源灝皆其門下士也著有諍友齋詩草

王正訓

歲貢生勤學好古為文法律律精嚴議論肅括體尤俊逸清超屢躋棘闈晚年遂絕意仕進子

定姓嘉慶丙子解元定珏同榜舉人可知淵源家學矣著有桐雨山房雜組怡軒詩草

何雲喬

嘉慶戊午副榜進取不苟潛心經史歷朝典故能言其概年八旬猶披閱不倦博學碩德文望蔚然

蔚然

王正琮

字方禮發燦子恩貢生年未弱冠蜚聲庠序詩古文詞皆入古人之奧赴秋闈十五次不售晚

年絕意進取教讀終身著有方湖詩草

王定寓

字秋舫正渠子增生從堂兄定柱之官遍歷滇蜀山川雄勝資其閱歷又與其賢士大夫游以

故詩筆清華朗潤鋒發韻流置之先輩名稿中亦無愧色其所由來者遠矣著有柳林漁笛詩

餘並詩稿數種

王定牲

字易亭號鹿坪生而純篤勤苦自厲迥邁恆流為文理精法密能度雍容未冠入邑庠旋食廩

餼中嘉慶丙子解元先是康熙丙子解元郝公濬鄉先輩也博學工書文名藉甚定牲後先輝

映人咸異之乙未大挑一等分發江蘇制軍以為篤學君子甚器重之南到省派委揚州幫審

鹽案時永清劉公源灝為太守重加委任署興化甘泉江都等縣省刑罰寬縱役慈祥愷悌百

姓稱為彌勒佛賦性恬退不慕榮利嘗曰折節以謀升斗催科以迫編氓皆違心之事決意辭

尊居卑改就教職補稟強訓導課士有方文風丕振引疾歸卒於家

王定珏

號玉峯性磊落為文超邁不羣弱冠入邑庠嘉慶丙子舉於鄉與兄同科中式藝林榮之乙未大挑二等補雞澤教諭品學兼優膠庠推服俸滿考驗保舉知縣分發廣東署化州知州時值英夷圍城定珏飭城堡練民兵艱苦備嘗州城得保無恙民稱頌之攝篆一年卸事歸省以疾卒於廣州咸豐八年長子世澤扶柩歸葬

何詒需

字春渠榆林知府夢蓮子性凝重簡外務嗜經史文詞早歲受書卓然欲以文章名世及長博學強識極深研幾功力加人數倍十六游庠十九食餼二十六登嘉慶甲子賢書乙丑連捷以第十七名魁會榜即用知縣改就教職銓河間教授時夢蓮以終養事竣入都供職家政羈身不遑履任屢游林下設帳授徒遠近聞風負笈者趾相錯因材造就析疑辨難使人怡然渙然故得其緒餘翕然稱名下士論文獨具隻眼有明國初諸大家神而明之曲盡其用意用筆之妙及老猶手自著書有四書酌註易經酌註書經酌註詩經酌註成周徹法演儒醫圭臬碧霞齋制藝古籀軒制藝課徒草文心針度擬陰陽文試帖古文傳贊數十種藏於家居鄉重公議忘私情待族人有加禮交朋友忼直無隱情御下寬恕奴僕皆樂為用精醫術所全活尤多

梁右渥

字香樵詩文沈博絕麗書法尤工道光乙酉優貢任武強訓導

孫述祖

字紹庭生而穎異篤志於學少長從名進士石公文奎肄業制藝而外旁及雜體二年學大進歸就試以冠軍入郡庠旋食廩餼名噪一時樂城張公世彥官河南知府延入幕課其子弟游歷南北得名山水之助文筆益健道光乙酉以拔萃獲雋學使毛公伯雨深加推重而數躡棘闈遂絕意進取訓迪後學得科第者甚多所作詩古文詞甫脫稿即為人持去尤工書法兼通醫術性倜儻敦氣誼居鄉虛寒蔭暘掛難解紛義所當為者輒毅然任之咸豐三年粵匪北竄縣令周公灝推為練長連絡城南數十村庄聲勢甚壯賊由變繞道入藁縣城賴以保全其功尤不可沒云

王定鶴 庠生小心謹慎不事浮華喜為詩著有十石齋詩草

王定瀛 庠生未冠詩名大噪精於圍棋文章深為潘芸閣學使所重年二十二歲卒著有村居閒咏詩草

王世永

按察使定柱子生雖貴介雍雍如寒素其好善樂施亦天性也書法宗董香光畫勝於書皆隨手散去生平吟咏頗多亦有志之士也著有老榆書屋閒吟

王世勳

號雪門道光戊子舉人任奉天吉林廳學正在任十一年訓士有方翰林于蔭霖郭鑑襄舉人于瑞霖皆出門下甚得士心剛直無私上憲有大事無不就學求決斷咸豐五年將軍景純保舉實任內閣中書告歸旋里辦理團練修補城垣文廟奎樓實心任事不憚勤勞知府王公啟曾保加內閣侍讀銜官吉林時藥城彭姓在吉作生意卒其子與舖夥朱姓不相能設計陷之獄將致之死世勳力救之出且經給其喪旋里候補巡檢馮某京師人孤身在吉並無眷口得

病未半月卒遲半年始有堂弟夫婦攜五女來尋馮到吉方知其兄已謝世半年窮甚世勳時周恤之如是者年餘且出囊金五十兩並代伊廣求親友得銀二百餘兩備雇車輛送其家老幼回京其慷慨濟人類如此

王蔭普

定柱孫知縣世耀長子負才雄博長於經濟為文氣骨高峻聲光鬱勃雄視世人弱冠補諸生食廩餼道光丁酉與弟蔭昌同登拔萃一時名流皆傾慕歎賞與結文字交乃屢困場屋並肆力於詩古文詞藻麗敏妙有人所不能及者涉獵之餘研精醫理治症多以意會無不立奏奇效四十七歲

王正同

發楠子才思超拔文筆嶸崎十五入郡庠十六食廩餼二十八歲拔萃慶官是為道光己酉數奇不偶潦倒以終吟咏最富隨手散去惜哉

王蔭豐

號石廬叔世瑞出繼三門無子父世耀以蔭豐承嗣天性肫摯事兩房克諧以孝潛心經史不

梁振華

梁振華 漢州知州用梅子奇才卓越健筆沈雄十八歲
痛惜之妻何氏賢明婦人也與蔭豐同月卒
見諸施行丁卯卒於官未竟其用當道者皆
隆平饒經濟敦氣節於國家事指陳利弊悉可
進士改庶常壬戌散館授檢討高文典冊翻版

梁振翹

梁振翹 傳無隱受業舉於鄉者孫汝霖史樽魯策王政
溫煦之等數十人捷南官者魯方等數人服闋
汪威縣教諭課士如在遵化時告歸仍日不輟
覽尤好藏名人書畫多至數十百種齒德並茂
品學兼優咸豐三年郡城戒嚴縣令周公灝以
防範事宜虛懷延訪振翹悉心籌畫辦理
團練不憚勤勞積勞成疾卒年七十二歲
才華瑰麗鋒發韻流年踰弱冠中道光乙酉舉
人踰數年卒

梁葵

梁啟達

梁葵 字凌九家貧夜讀無以舉燈火燃香照讀每至
達旦弱冠入邑庠為學愈攻苦衣不解者數月
飯糗茹草意豁如也二十六歲中道光辛巳恩
科舉人教授生徒不少寬假門下士多成立者
庚子二月委署東光訓導旋補西甯教諭抵任
後兼長洪洲書院誨人不倦大振文風庚戌以
父天錦多病告歸侍養承顏悅志務得父母歡
心暇則與弟姪輩課晴雨話農桑閒作詩文以
自娛樂書法結構端整取法平原
人爭寶重之年五十九歲以壽終
善屬文工書法乾隆己酉拔貢端方正直人多
畏懼凡衣冠不整行止不端者見之輒避去任
阜城教諭師範尊嚴道貌偉岸俸滿告歸耳目
聰明齒牙堅固年登耄耋猶作小楷細書鄉里
口角欲興訟端據理公評安人息事
入十七歲以壽終鄉隣思慕者甚衆

梁天培

史芸

史芸 字春圃廩生性穎悟嗜學從兄葵肄業髫年入
泮旋食廩餼邑令周子純會課見其文激賞之
延入縣會文與李淑梅胡元照等互相砥礪積
勞得血疾用功刻苦不衰龐寶生學使拔冠一

軍刻其文於畿輔試牘而屢荐不售以諸生終
 饒經濟敦氣節咸豐三年同治七年粵匪捻匪
 肆擾舉辦團練帶勇守城夜宿城樓備嘗艱苦
 周公謂之曰吾以汝為武職不意為文學選也
 遂受知王秋浦太尊鄭心慈夏小笠大令皆刮目
 待之事平保舉王太尊謂之曰吾以汝可望科
 第是區區者不足為
 汝重也故功不叙云

呂有志

字荔庵幼出嗣叔父家寒素奉養艱窘刻意讀
 書以圖上進道光丁亥入縣學教讀近村以奉
 甘旨能得兩房歡心游進士何詒需之門得其
 養性靈宗旨每日五更斂膝靜坐默會四子書
 及經史古文大家皆與性靈相融貫所著制藝
 清奇濃淡不拘一格無不推陳出新詒需深器
 重之乙未舉於鄉以貽需所傳成就後學功課
 嚴密不計修脯弟子貧者尤體恤周至登科第
 入膠庠者接踵而起同治壬戌司訓平鄉甫下
 車召諸生諭之曰余教書三十年今為教官教
 秀才乃其職也欲受業者勿以束修為念教官
 之俸即束修也諸生感奮仍以詒需所傳授之

科第連綿文風丕振平鄉故城傾圮梟匪肆逆
 往來逼城與縣尹蘇公性協力修築制軍劉保
 加鹽提舉銜戊辰捻逆北竄守城有功節相官
 保賞藍翎其他修縣志修書院修學宮無不籌
 畫經營從容就理在任十二年與同事俞君際
 清吳君增榮韓君毓松共濟和衷推誠相與死
 生患難之際尤以義俠聞癸酉以病告歸卒於
 家平生事親極孝兩房父母皆膺封典之榮伯
 兄有敬早卒嫂張氏奉養終身仲兄有義及姑
 姊妹皆極貧極力周恤無倦色族人有侵占祖
 塋者為尸買地以易之

馬錦

字繡亭生員性孝友輕貲財教誨鄉里子弟以
 忠孝節義持論節孝祠自道光十年重修後屢
 經風雨塌卸殆盡錦慨然倡首於同治六年重
 修不數月工畢廟貌一新其維持風化類如此
 字輝宇世著武功且竭忠節迎昶獨以文學顯
 重厚簡默受業恂恂詩文皆有才氣同治己巳
 賀雲甫學使取入邑庠庚午壬申鮑花潭夏小
 松學使兩取優等食餼於庠且以詩古受知癸

閻迎昶

酉七月赴都鄉試且考優貢未入場以暴疾卒於京可惜也可哀也

梁瑞霖

字鷗亭積學能文詩筆磊落英奇丰骨道峻乾隆乙卯副榜第一官密雲教諭江西浮梁知縣著有四惜

軒詩草

劉向生

道光壬辰舉人風雅能詩重然諾好出游不甚家居得山川之助文思愈壯與之游者喜其超曠復重其樸誠著作甚多惜不傳

朱世漪

字又漪廩生參將錕長子年七歲父終任所扶柩奉母攜兩幼弟自惠州旋里營葬就傅讀書聰明穎悟十七入邑庠因老母在堂無志求名奉養之餘潛心經史不事時藝母故哀慟嘔血成疾獨卧十年卒著有幽風詩一卷月令詩一卷百姓羣集十二卷

孔慶元

行唐把總振羽子生而穎異氣宇軒昂年十八入邑庠學使萬蕘船先生歲科連取優等得食廩餼肄業恒陽書院深為前令周公鑒所器重惜未及三十以疾終

對庭先生傳

梁清遠

對庭先生姓安氏名策正定諸生也幼聰慧有意於古學好讀秦漢書其為文變化無常格時而高峻如峩眉積雪時而奇古如怪石枯松時而鴻博奧衍如長江大河一瀉千里都御史左公光斗世稱能文章時為督學大加賞識乃屢試不售遂以授經為事夫經學者王化之統記後人第依傳注註解鮮能窺其奧義先生深思廣覽於諸經各有悟入每坐臯比與諸弟子談說門弟子咸若發蒙即隱僻深奧人所不能盡解者先生以數語指示之無不豁然如此垂三

十年門弟子陟高科相繼起而先生猶諸生如故然
介介自持無所求於世也晚好琴所至常以琴自隨
撫之其聲悲壯聞者泣下蓋先生不得意其興致一
寓於琴云

梁子曰才士不恒有而通經博古之士尤不恒有也
乃先生竟以諸生老則何耶蓋時所尚者制舉義制
舉義狃於一格先生變格而爲之是以不合於時也
使當時重經學匡稚恭公孫宏之業先生猶能爲顧
世不重經學則先生不合於時也又宜吾獨惜先生
生平所學而僅以一琴寫之也嗚呼可嘆哉

泠然堂事略

梁清遠

泠然堂者先大父澹明公辭榮栖隱之所也公當神
宗朝應以廕補官辭不受性高逸視冠冕如桎梏於
世味泊如也受知於高邑趙忠毅公及無錫高忠憲
公忠毅贈詩有美人抱孤清忠憲贈詩有何必酒人
能好客從來名士不宜官之句則公之生平可概見
矣爲園於鎮州闌闔中有堂五楹顏曰泠然蓋亦有
御風之遐思焉堂左小亭顏之曰貴適傍有小齋顏
曰清福堂右有小池池後建高閣曰挹霞卽趙忠毅
公題詩處閣左有竹石山房有茶寮堂之兩旁皆石

公有襄陽之癖凡西山佳石生平搜剔殆盡而堂前五石更磊落有古致閣前一石巨而且秀直如翠芙蓉又古木深鬱花木暢茂雖在闐闐無殊深山堂中列古鼎彝書畫摩挲其間茗椀爐香相對終日郡邑有司曾不一謁佳時良日則邀素心友一壺一榼談元講學性不能飲而好與酒人奕奕棋稱無敵手而興至則爲之亦非甚嗜至揮毫染翰則無間日得平原畫沙印泥之妙作枯木竹石自成一家刻圖章深明古篆法晚好佛日焚修於挹霞閣盡覽元乘臨終語某曰性命之事不可忽宜早圖之又喜夜談每夜

必聚諸孫或談世務或談名理或談先世舊事或談文藝娓娓不倦更篤愛某某爲長孫日侍膝下行則攜几杖以從家君爲尙寶丞掌秘閣典籍公一至都門受銜仕之封一衣鶴鵲袍歸卽緘之笥中不再服布衣芒履逍遙終身其高曠類如此順治甲申歲卒享年七十七諱志字尙甫號澹明忠毅公集中所稱滹水則先大父初號云

題尙甫挹霞閣

趙南星

美人抱孤清塵世何喧卑菌閣起天際白雲生簾帷
崩劣見恒嶽滹沱呀周池一區稱九州厯厯可俯窺

山文鼎元 卷三十一 六
朝霞以爲餐絕粒永不飢丹彩發玉顏形容無從衰
王母來崑崙颯颯飛雲旗不速東王公相 以嬉世
事何足言滄桑止斯須我不慕道

九日登挹霞閣

梁清遠

佳節閒園倦倚樓晴雲遙望四山秋籬邊黃菊花猶
斂檻外寒松翠欲流醉客無須浮大雅登高何必陟
崇邱乾坤此日堪行樂人事蕭條未足愁



7000635

